

# KAMEETHARI ÑAANTSİ ROSANKENATAKERİ MARCOS

*Ikamantantakeri Juan omitsitsiyaatantaneri  
(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Jiroka okanta opoñaantari Kameethari Ñaantsi kenkithatakotziriri Itomi Pawa, jitachari Jesucristo. <sup>2</sup> Pairani eenitatsi Kamantantaneri iita Isaías. Rosankenatakotakeri Pawa ikamantziri Itomi, ikantziri:

Notomí, ari notyaantake etyaawone kenkithatakotemine,

Iri wetsikaantemine.

<sup>3</sup> Richeraapaake ochempiki, inkantapaake: Powameethatainiri Awinkatharite tsika inkenapaake,

Poshiyakaantero rotampatzikaitziro awotsi.

<sup>4</sup> Ari okantaka, monkaataka ikenkithaitakeri. Ikenkithatake pairani Juan ochempiki, ikenkithatakotakero omitsitsiyaataantsi, ikantapaake: “Pomitsitsiyaawentaiyaari Awinkatharite, pookairo kaariperori, ari rariperotaimi pikaariperowetakaga.” <sup>5</sup> Osheki pokashitakeriri Juan, Judea-satzi eejatzi Jerusalén-satzi. Ithawetakotapaakero iyaariperoshirenka, irojatzi romitsitsiyaatantawakariri ñaaki Jordán. <sup>6</sup> Ikithaatari Juan rontyagaitziro iwitzi camello. Romathakitar mashitsimashi. Rowayetari maapataki, ririri iyaa pitsi. <sup>7</sup> Jiroka ikantake Juan ikenkithatzi: “Kaakitake maperotzirori ipinkatharentsitzi, nopinkathatzitari

naaka. Te onkantaatsikaitya roshiyakaina rimperatanewo noiyotashitantlyaariri no-zapatoreeri. <sup>8</sup> Iri omitsitsiyaatantairine Tasorenkantsi. Irooma naaka nomitsitsiyaatantashimatsitawo ñaa.”

*Romitsitsiyaata Jesús  
(Mt. 3.13-17; Lc. 3.21-22)*

<sup>9</sup> Ikanta ripokake Jesús ipoñaakawo nampitsiki Nazaret saikatsiri Galilea. Romitsitsiyaatawakeri Juan antawaaki ñaa Jordán. <sup>10</sup> Iro ritonkaantanaiaarime Jesús, oshiyankawo ashitaryaanakityeeyaame inkite, iñaawakeri rishaawiinkashitapaakeri Tasorenkantsi ikenapaake jenoki roshiyapaakari shiro. <sup>11</sup> Ikemaitatzi jenoki ikantaitanake: “Osheki nokimoshirewentakemi Notomí, eerokaga netakokitane.”

*Inkaariperotakagaiterime Jesús  
(Mt. 4.1-11; Lc. 4.1-13)*

<sup>12</sup> Ikantakaanakari Jesús Tasorenkantsi, jatanake ochempiki. <sup>13</sup> Ari ikowawetaka Satanás inkaariperotakairime. Tema osheki kiteesheri risaikake itzimira atsikantaneri, okaatzi 40 kiteesheri. Irojatzi ripokantapaakari maninkariite ramitakotapaakeri.

*Retanakari Jesús rantayetziri  
(Mt. 4.12-17; Lc. 4.14-15)*

<sup>14</sup> Ikanta ikenanake Jesús Galilea-ki inkaman-tantero Kameethari Ñaantsi kenkithatakotziriri Pawa tsika ikanta ipinkathariwentantzi. Arira romonkyagaitakeri Juan irirori. <sup>15</sup> Ikantapaake Jesús, ikamantantzi: “Monkaatapaakaga

iñagaitantyaariri Pawa impinkathariwentante, pinkemisantairo Kameethari Ñaantsi. Pookairo pikaariperowaitzi.”

*Raantaitanakariri tarajaatzinkari ikaatzi 4  
(Mt. 4.18-22; Lc. 5.1-11)*

<sup>16</sup> Okanta otsipa kiteesheri ikenanake Jesús inkaarecheraaki Galilea, iñaapaatziri jitachari Simón itsipatakari irirentzi Andrés itarajaataiyini. Tema tarajaawaarentzi rini. <sup>17</sup> Ikantapaakeri: “Poyaatena, oshiyaiyaawo iriime atziripaini nontarajaatakagaimiri.” <sup>18</sup> Royaatanakeri, rookanakero itarajaamento. <sup>19</sup> Iro ranashineentanaka, iñaapaatziri itomipaini Zebedeo jitachari Jacobo itsipatakari irirentzi Juan, risaiki ipitoki rowamatankawaitzi itarajaamento. <sup>20</sup> Raanakeri eejatzi. Eeniyo risaikanake ipaapate itsipatanaari ratzirite.

*Atziri raayiri peyari  
(Lc. 4.31-37)*

<sup>21</sup> Ari rareetayakani Jesús nampitsiki Capernaum. Okanta kiteesheri rimakoryaan-titari, riyotaantapaake ipiyotaitapiintaga. <sup>22</sup> Te imana ishintsinka riyotaantzira, ranaanakeri Yotzinkaripaini, antawoite riyokitziwentaitanakeri. <sup>23</sup> Ari risaikake atziri raayiri peyari, kaimanake irirori, <sup>24</sup> ikantzi: “Jesús, Nazaret-satzi, niyotzimi naaka, eerokatake itasorentsite Pawa. Iro pipokantari jaka pithonkaiyenani.” <sup>25</sup> Ikantanakeri Jesús: “¡Pisantzikote peyari! ¡Piyaatal!” <sup>26</sup> Ikaimanake antawoite atziri, rompetatakaawaitanakari iweyarite, rookanakeri. <sup>27</sup> Ikantawakaanaka

atziripaini: “Pamineri jirika, rowawisaakotziri raayiri peyari.” Riyokitziiwentaperotanakeri.  
**28** Intsipaite ikemakoitanakeri Jesús Galilea-ki.

*Retsiyatakagairo Jesús riyote Pedro  
(Mt. 8.14-15; Lc. 4.38-39)*

**29** Ikanta rishitowanai Jesús ipiyotaitapi-intaga, itsipatanakari Juan eejatzi Jacobo, ikenaiyanakeni ipankoki Simón, risaikira eejatzi Andrés irirentzi Simón. **30** Iro rareetapaakityaani, ikantaitawakeri: “Okatsiiwaitatzi riyote Simón.”  
**31** Ripithokashitanakawo, rotaiyawakotakero, roisaikakero. Etsiyatanake oyatsiirentsite. Piriintanaka aminanake oita ompawakeriri.

*Retsiyatakagairi Jesús mantsiyari  
(Mt. 8.16-17; Lc. 4.40-41)*

**32** Okanta otsireniityaanake, ramaitapaakeniri Jesús osheki mantsiyari, ramaitapaakeniri ee-jatzi raaganewo peyari. **33** Ipiyotaiwentapaakari pankotsiki. **34** Retsiyatakotakaayetairi maawoini. Te rishinetanairi riñaawaitanai peyari, retsiyatako-takagairira ikaatzi raagayetziri. Tema riyotzi peyari tsika iita Jesús.

*Riyotaantzi Jesús maawoini Galilea-ki  
(Lc. 4.42-44)*

**35** Okanta okiteeshetzimatake, ananinkanake Jesús ramana ochempiki. **36** Ikanta Simón itsipatakari ikaatzi royaataiyirini, rithotyaakotairi. **37** Ikanta iñaapairi, ikantapairi: “Yotaanari, rithotyaakoitatzimira.” **38** Rakanake irirori ikantzi: “Jame aate, te iro nipokantyaari nisaike jaka, ontzimatye niyotaante otsipaki

nampitsi.”<sup>39</sup> Ari okantaka, rithonkakero Jesús ranashitawo Galilea, riyotaantake maawoiniki nampitsi ipiyotaitapiintaga, retsiyatakotakaake osheki raaganewo peyari.

*Retsiyatakotakagairi imatane pathaawontsi  
(Mt. 8.1-4; Lc. 5.12-16)*

<sup>40</sup> Ikanta ripokake imatane pathaawontsi, rotziwerowashitapaakari Jesús, ikantapaakeri: “Pikowirika petsiyatakotakagaina, niyotzi tzi-matsi pishintsinka petsiyatakotakaantantenari.”

<sup>41</sup> Raminanakeri Jesús, retakoshiryaanakari. Riterotantakari rako, ikantanakeri: “¡Nokowi, petsiyatakotai!”<sup>42</sup> Etsiyatakotanake ripathaawai-weta.

<sup>43</sup> Ikantawetawaari riyaataira inampiki,  
<sup>44</sup> ikantziri: “Eero pithawetakotana. Tampatzika powanairo piyaatashiteri Imperatasorentsitaari, pimonkaatairo Inintakaantakeri pairani Moisés-ni, paanake pinkitewathatantaiyaari, iro riyotantaityaari etsiyatakotaimi.”<sup>45</sup> Ikanta pathaawaiwetachari, ithawetanake nampitsiki tsika ikanta retsiyatakotantaari. Iroowa kaari risaikantanaa Jesús nampitsiki. Jatake ochempiki, ari risaiki. Ari riyaatashitziri osheki atziri.

## 2

*Retsiyatakotakagairi Jesús kisopookiri  
(Mt. 9.1-8; Lc. 5.17-26)*

<sup>1</sup> Awisake otsipa kiteesheri, eejatzi ripiyaawo Jesús nampitsiki Capernaum. Ikemaiyawaini atziri, ikantaitzi: “Areeetaawo Jesús.”

<sup>2</sup> Ipiyowentaitawaari, te rimonkaatapaakawo

pankotsi. Riyotaayetapairi maawoini. <sup>3</sup> Eenitatsi atziri ikaatzi <sup>4</sup> pokashitakeriri Jesús inatakotakeri kisopookiri. <sup>4</sup> Te onkantya iñeeri, rotzikaakeri osheki atziri piyotainchari. Rateetashitakeri jenoki pankotsiki, imoontashitakeri ikatziyakaga Jesús, rowayiitakotakeri mantsiyari. <sup>5</sup> Ikanta Jesús, riyotakotawakeri rawentaatyaaari, riñaanatawakeri mantsiyari, ikantziri: “Notomí, rariperotaimi pikaariperowetakaga.” <sup>6</sup> Kemaiyawakeni Yotzinkaripaini, ikantashiretanake irirori: <sup>7</sup> “Rithainkakeri Pawa jirika. Tema tekaatsi peyakotanterone kaariperori, apatziro ikantakaawo Pawa ipeyakotantziro.” <sup>8</sup> Riyotake Jesús ikenkithashiryaari, irojatzi rosampitananakari, ikantziri: “¿Itaka pikenkithashiryaantawori jiroka? <sup>9</sup> ¿Tema inimotemi nonkanteri kisopookiri: ‘Rariperotaimi pikaariperowetakaga?’ ¿Iro pikowi nonkanteri: ‘Pinkatziye, paanairo pomaryamento, piyaatai?’ <sup>10</sup> Iroñaaka piñeeri Itomi Atziri osheki ishintsinka, rariperotairi kaariperoshireri.” Ripithokashitanakari kisopookiri, ikantanakeri: <sup>11</sup> “¡Pinkatziye! Paanairo pomaryamento. Piyaatai.” <sup>12</sup> Katziyanaka mantsiyari, raanairo romaryaantari, shitowanake. Maawoini atziri iñaawairi. Riyokitziwentanakeri iñaakerira. Ikimoshirewentanakeri Pawa, ikantzi: “Imapero okameethatzi jiroka. Te añaapiintziro oshiyaawone.”

*Raantanakariri Jesús jitachari Leví  
(Mt. 9.9-13; Lc. 5.27-32)*

**13** Ikanta rapiitapairo Jesús riyotaapairi atziri inkaarecheraaki. Ari ipiyowentaitawaari eejatzi. **14** Ikanta rithonkanakero riyotaantz, awisanake. Irojatzi iñaantapaakariri itomi Alfeo jitachari Leví, risaiki rapatotziri koriki. Ikantapaakeri: “¡Poyaatena!” Katziyanaka, royaatanakeri. \* **15** Ikanta Leví raanakeri Jesús rowakayaari ipankoki. Ari riyaatzitanakari riyotaanewo, itsipatapaakari apatotziriri koriki, itsipatapaakari eejatzi kaariperoshireri. Osheki piyotainchari rowaiyani. **16** Ikanta Fariseo-paini itsipatakari Yotzinkaripaini, rosampitakeri riyotaanewo Jesús, ikantziri: “¿Itaka itsipatantariri iyotaimiri kaariperoshireri, itsipatakari eejatzi apatotziriri koriki?” **17** Ari rakanake Jesús, ikantanake: “Arika imantsiyate atziri ripokashitziri aawintantzinkari, iriima kaari mantsiyatatsine tekaatsi inkowe irirori. Tera iri nipokashite kameethashireri, tema nipokashitatziri kaariperoshireri nonkaimashireyetairi.”

*Ikenkithatakotziro Jesús tziwentaantsi  
(Mt. 9.14-17; Lc. 5.33-39)*

**18** Tzimatsi pokashitakeriri Jesús, rosampitapaakeri ikantziri: “Ritziwentapiinta riyotaanewo Juan, ari ikantaiyani riyotaanewo Fariseo-paini. ¿Itaka kaari ritziwentanta piyotaanewo eeroka?” **19** Rakanakeri Jesús, ikantziri: “Arika intsipataityaari aawakainkari, ¿Arima rowashiretaitya? Eero rowashiretaita, kimoshire inkantya

---

\* **2:14** Jirika Leví iriitake jitachari eejatzi Mateo.

rowawaitya. <sup>20</sup> Irooma paata, arika ragaitakeri iimentaitari, aripaite ritziwentaitya. <sup>21</sup> Arikame rowamatankaitantyaawo owakerasaperi antyashipawo kitharentsi, ari isagaaperotanake amithatanakyaarika owakerasaperi. <sup>22</sup> Iro kameethatatsi apiyaatantyaawo eeryaari riraitziri owakerari mashitsinaki. Irooma apiyaatantashitakyaaworika antyashipari mashitsinaki, ari itankakotanake, apitepaini eewanawaitashitakya.”

*Ikenkithatakotziro Jesús kiteesheri rimakoryaantaitari  
(Mt. 12.1-8; Lc. 6.1-5)*

<sup>23</sup> Okanta kiteesheri rimakoryaantaitari, ikenanake Jesús pankirentsimashiki. Ari rowiikitanake riyotaanewo okithoki pankirentsi. <sup>24</sup> Te inimoteri Fariseo-paini, rosampitakeri Jesús, ikantziri: “¿Itaka rowiikitantawori pankirentsi piyotaanewo? ¿Tema riyotzi te ishinetaantsite kiteesheriki rimakoryaantaitari?” <sup>25</sup> Rakanake Jesús ikantzi: “¿Tema piñaanatakotziri ikantakota David itsipatari ikaataiyinira aantawetakariri ritashe? <sup>26</sup> Ikyake tasorentsipankoki reewaritzira Abiatar, rowakawo owanawontsi tasorentsitsiri, ipakeri itsipayetakari. Te ishinetaantsiweta, inta rowapiintawo Imperatasorentsitanewo.” <sup>27</sup> Eekero ikantatzi Jesús: “Iriira atziri kantakaawori riwetsikantaitakawori kiteesheri rimakoryaantaitari. Kaarira kiteesheri rimakoryaantaitari kantakayaawone riwetsikantitariri atziri. <sup>28</sup> Jirika Itomi Atziri ipinkathariperotzi irirori, ranairo jiroka kiteesheri.”

**3**

*Atziri kisoimpekiri  
(Mt. 12.9-14; Lc. 6.6-11)*

<sup>1</sup> Ikanta ikyaapai Jesús ipiyotaitapiintaga. Ari risaikake atziri kisoimpekiri. <sup>2</sup> Ikowaitatzi iñagaiteri retsiyatakotakagaiteri mantsiyari kiteesheriki rimakoryaantaitari. Aamaako rowaitakeri inkantakoitantlyaariri. <sup>3</sup> Ikanta Jesús ikaimakeri mantsiyari, ikantziri: “Pipokeeta, posatekya niyanki.” <sup>4</sup> Rosampitakeri piyotainchari, ikantziri: “¿Oitaka shinetaantsitsatsiri anteri kiteesheriki rimakoryaantaitari? ¿Tema onkantya aneshironkatante, irooma kameethatatsi owamaante? ¿Tema onkantya antero kameethari, irooma kameethatatsi ankaariperowaite?” Tekaatsi akatsine. <sup>5</sup> Raminanakeri Jesús piyowentakariri, owatsimaashiretanakeri iñaakerira te ineshironkatante, ikantanakeri mantsiyari: “¡Pampiryaawakotai!” Matanaka, akotsitanai kameetha atziri. <sup>6</sup> Ikanta Fariseo-paini, jatanake ikenkithawaitakairi akiriri Herodes raminakero tsika inkantero ritsitokakaantantlyaariri Jesús.

*Ipiyotaita inkaarecheraaki*

<sup>7</sup> Ikanta rishitowanake Jesús, ikenanai inkaarecheraaki itsipatanaari riyotaanewo. Kisokero rowanakeri Galilea-satzi, Judea-satzi, <sup>8</sup> Jerusalén-satzi, Idumea-satzi, maawoini nampitawori intatsikeronta antawaaki ñaa Jordán. Ikemakotakeri eejatzi Tiro-satzi, Sidón-satzi, ikantaitzi: “Osheki ritasonkawentantake Jesús, roñaagantake osheki

kaari iñagaitapiintzi.” Pokaiyanakeni ramineri.  
 9 Iro ikantantanakariri Jesús riyotaanewo rithotyaakoteniri pitotsi, eero ranawayaantaitari.  
 10 Rimatakero Jesús, retsiyatakotakaantake. Otatsinkawirinikyaatanaka mantsiyari ikowi riterotantyaari rako. 11 Ripokayetzi raaganewo peyari, rotziwerowashitari Jesús, antawoite ikaimi, ikantzi: “¡Eeroka Itomi Pawa, niyotzimi naaka!” 12 Eero riyotzitantaitari Jesús, ishintsineentanakeri.

*Rotyaantaperore Jesús ikaatzi 12  
 (Mt. 10.1-4; Lc. 6.12-16)*

13 Ikanta ritonkaanake Jesús ochempiki. Ari ikaimakaantakeri wetsikimotariri. Jataiyakeni ikaatzi ikaimakaantakeri. 14 Ari riyoyaake intsipatiintyaari ikaatzi 12, iriira rotyaatakeri inkenkithatakaante. 15 Ripasawyaakeri retsiyatatakotakaayetairi mantsiyari, eejatzi raagayetziri peyari. 16 Jirika ikaatzi riyoyaakeri: Simón, iitakeri Pedro. 17 Eejatzi Jacobo itomi Zebedeo itsipataakeri Juan, irijatzi rowawiiroki Jacobo. Iitakeri “Boanerges”, (akantziri apaanteki aaka: “Otomi ookathawontsi”). 18 Eejatzi Andrés, Felipe, Bartolomé, Mateo, Tomás, Jacobo itomi Alfeo, Tadeo, eejatzi Simón jitachari “Jokaakotantaneri”, 19 eejatzi Judas Iscariote, iri pithokashityaarine paata.

*Kishimatzipiri Tasorenkantsi  
 (Mt. 12.22-32; Lc. 11.14-23)*

20 Ikanta rareetawo Jesús pankotsiki. Ari ipiyowentawaari osheki atziri, te inkantaiya riyaatapainte rowaiya Jesús. 21 Tzimatsi

kantatsiri: “Shinkiwentaka Jesús.” Iro ripokantawetakari isheninkathori, raanairime. <sup>22</sup> Areetapaaka Yotzinkaripaini ipoñaakawo Jerusalén-ki, ikantapaake irirori: “Jirika atziri ripasawayatziiri ashitariri peyari jitachari ‘Beelzebú’, iro retsiyatatakantari raaganewo peyari.” <sup>23</sup> Ikanta ikemake Jesús, rapatotakeri, roshiyakaawentatziniri, ikantziri: “¿Tzimatsima peyari kaminaawakaachari eero raagantanta?” <sup>24</sup> Arika romanatawakaiya inampiki atziri, ari rookanawentawakaakya. <sup>25</sup> Arika romanatawakaiya ipankoki atziri, ari iñaakero rookanawentawakaiya. <sup>26</sup> Ari ikantari eejatzi peyari arikame romanatawakaiya, ari rookanawentawakaakya, eero iñaaperota, ari rithonkyaa. <sup>27</sup> Atziri ñaaperotachari kameetha, tekaatsi kanterine inkyashiteri rayiteri oitarika tzimatsiri ipankoki. Irooma arika roosotaitakeri, atake rimataitakeri.

<sup>28</sup> Pinkeme nonkante: Ari rariperotairi Pawa kaariperotatsiri, onkantawetaka inkishimawai-teri. <sup>29</sup> Iriima kishimatzipirri Tasorenkantsi, rashirowatyero, eero rariperotairi.” <sup>30</sup> Iro ikantantakari Jesús, tema ikantaitatziri: “Kamaari rini.”

*Iriniro Jesús otsipatakari irirentzipaini  
(Mt. 12.46-50; Lc. 8.19-21)*

<sup>31</sup> Areetapaaka iriniro Jesús otsipatakari irirentzipaini, okaimakaantapaakeri, okatziyapaaka jakakeroki. <sup>32</sup> Ikantawetakari ikaatzi piyowentakariri: “Ari ipoki piniro otsipatakari pirentzipaini, okowi oñeemi.” <sup>33</sup> Ikantanake Jesús: “¿Litaka pikenkithashiryaari

iroowa nonaanate, iriira nirentzitari?”  
 34 Raminanakeri piyotainchari, ikantzi:  
 “Jirikapaini, iri noshiyakagairi yeeyepaini,  
 irojatzi noshiyakagairi naana. 35 Ikaatzi  
 antanairori ikowiri Pawa, iriira nirentzitari,  
 iro nitsirotari, irojatzi ninirotari eejatzi.”

## 4

*Ikenkithatakotziri Jesú斯 pankiwaientzi  
 (Mt. 13.1-23; Lc. 8.4-15)*

1 Ikanta ripiyanaa Jesú斯 inkaarecheraaki, riyotaantapai. Ipiyowentaitawaari. Otetanaka pitotsiki, risaikakotake niyankyeeronkaini, katziyaiyakani atziri ocheraaki ikemisantziri.  
 2 Okaatzi riyotaayetziriri, roshiyakaawentatziniiri, ikantzi: 3 “Jatake pankiwaientzi, impankiwaite. 4 Ikanta rookakitakero iwankire, tzimatsi jokakitapainchari awotsiki. Ari rayiitaiyapaakeni owawori. 5 Tzimatsi otsipa jokakitapainchari omapipookitzi. Intsipaite ishookawetanaka. Tekaatsiperowa kipatsi, 6 sampishitanake pankirentsi ooryaanakera. Tema te onkyaaperote oparitha inthomoiki. 7 Tzimatsi otsipa jokakitapainchari kitcheemashiki, anaanakero iroori ishookanake. Te okithokitzi, 8 Tzimatsi otsipa jokakitapainchari okameethapathatzira kipatsi, saankana ishookanake, kithokitanake maawoini. Tzimayetai okithoki apaanipaini okaatzi shookayetanaaintsiri. Apaani shookapaintsiri, eepiyokiini okithokitanake,

otsipa shekipiyokitanaintsiri, otsipa shekichonchoitanaintsiri okithoki.” \* <sup>9</sup> Eekero ikantanakitzi Jesús: “Kowatsiri inkemathatero, rowayempitatyā inkemisante.”

<sup>10</sup> Ari riyaataiyanaini maawoini atziri, apa risaikanai Jesús itsipatanaari oyaatapiintziriri, eejatzi riyotaanewo ikaatzi 12. Ari rosampitakeri Jesús, ikantziri: “¿Tsika okantakotaka okaatzi poshiyakaawentakeri inkaaganki?”

<sup>11</sup> Rakanakeri Jesús, ikantzi: “Iroñaaka nonkamantemiro kaari piyotakoweta, ari piyotairo jimpe ikanta Pawa ipinkathariwentantzi. Iriima itsipapaini, eero nokamantzitari, apa noshiyakaawenteniri, <sup>12</sup> eero riyotakotantawo ikemawetari. Onkantawetya inkemisante, eero ikemathatziro, eero rowakerashireti irirori, tema eero rariperoitairi.” <sup>13</sup> Ikanta

Jesús rosampitakeri, ikantziri: “¿Tema piyotawakero noshiyakaawentakeri? Arika napiitakemiro noshiyakaawentemiro, ¿tsika onkantyaaka piyotantyaawori? <sup>14</sup> Jirika atziri jokakitakerori iwankire, iri roshiyakaawentaitzi kenkithatakotzirori riñaane Pawa. <sup>15</sup> Eenitatsi kemawetawori ñaantsi, ripokapaake Satanás, imaisantakaapaakeri. Iri oshiyakaawentakeri jokakitapainchari awotsiki. <sup>16</sup> Eenitatsi kemawetawori ñaantsi, intsipaite ikemisantaweta. Roshiyakotakawo jokakitapainchari omapipookitzira, intsipaite ishookawetanaka. <sup>17</sup> Tera

---

\* **4:8** Kantakotachari jaka “eepiyokiini okithokitanake, otsipa shekipiyokitanaintsiri, otsipa shekichonchoitanaintsiri okithoki”, aamaakawo okaatzi 30 okithoki, otsipa okaatzi 60 okithoki, otsipa okaatzi 100 okithoki.

riyoperotateyeero ñaantsi, te inkisashityaawo rowasanketaitziri ikemisantawetawowa ñaantsi, rowashaantanakero. Roshiyakawo pankirentsi sampishitanaintsiri, te onkyaaperote oparitha inthomoiki kipatsiki. <sup>18</sup> Eenitatsi itsipa kemawetawori ñaantsi, oshiyakaawentakeri jokakitapainchari kitocheemashiiki. <sup>19</sup> Okantakaantziro ramatawiwaita apaniroini, ikenkithashiryaakotawo rashaagantya, iro ikowaperotake ontzimimotairi maawoini. Awisanakero ñaantsi ikemawetakari, roshiyakawo pankirentsi kaari kithokitatsine. <sup>20</sup> Eenitatsi kemawakerori ñaantsi, oshiyakaawentakeri jokakitapainchari okameethapathatzira kipatsi. Ikemisantanai, roshiyakawo apaani shookapaintsiri, tzimanaintsiri eepiyokiini okithoki, otsipa shekipiyokineentanaintsiri, otsipa shekichonchoitanaintsiri okithoki.” †

*Onkoñaatakoyetai manakowetainchari  
(Lc. 8.16-18)*

<sup>21</sup> Ari ikantanake eejatzi: “Ankowerika oorentakotya, ¿arima ashitakotakeri oorentamento? ¿Owakotzirima otapinaki? Tera. Akowatzi onkoñaate maawoini onkene aminawaite. <sup>22</sup> Ari onkantaiya eejatzi, onkoñaatakoyetai manakowetainchari, ooñaawontairo kaari ikemathaitzi pairani. <sup>23</sup> Kowirori ikemathatairo, inkemisante.” <sup>24</sup> Ikantanakeri eejatzi: “Paamagaiyaawo okaatzi pikemakeri. Otzimikari pantzimotantane, rimaperoitaimikari paata

---

† **4:20** Paminero kantakotachari versículo 4.8.

eero ka. ‡ 25 Ikaatzi oshekitzimotziri oitarika, eekerowa oshekitzimotatyeri. Iriima kaari oshekitzimotzi oitarika, eekerowa riyaatatyeyero oshekitzimotziri.” §

*Roshiyakaawentziri Jesú斯 rishooki pankirentsi*

26 Ikantanake eejatzi Jesú斯: “Arika impinkathariwentantai Pawa, roshiyari pankiwainrentzi, 27 rimayi tsireniriki, inkakitamanai. Te riyote tsika okanta rishookantari iwankire. 28 Apaniroini rishooki, riyothowatanake oryaani oshi, ripowainkaryaanake, patanake. 29 Arika risampatake, monkaataka rowiitaiteri.”

*Roshiyakaawentatziro okithokyaaniki inchato  
(Mt. 13.31-32; Lc. 13.18-19)*

30 Ikantanake eejatzi Jesú斯: “¿Itaka oshiyari ipinkathariwentantai Pawa? ¿Itaka noshiyakaawentemiri? 31 Oshiyatyaawo arika ampankitero okithokyaaniki pankirentsi. Onkantawetya oryaaniinitzi, \* 32 arika ampankitakero, ishookanake, anaanakero otsipa pankirentsi, antawotewatanake, ari imenkoshityaari tsimeryaani itsimankat-apishitzira.”

‡ 4:24 Okaatzi kenkithatakotachari jaka, jiroka okantakota: Eepichokiinirika pinkemisantawakena, eepichokiini piyotairo. Irooma pinkemisantawakerika osheki, oshekira piyotawake, eekero niyotakaaperotatyemiro. § 4:25 Jiroka okantakotziri okaatzi ikenkithatakotziri jaka: Ikaatzi yotawakerone niyotaakeriri, eekero niyotaaperotatyeri. Iriima kaari kemisantawakerone niyotaawetariri, rimaperotaiya eero riyotairo. \* 4:31 Iro ikantakoitzi jaka “okithokyaaniki pankirentsi”, jitachari mostaza, shookatsiri inampiki itsipa atziri.

*¿Litaka roshiyakaawentantawori Jesúis  
ikenkithatziri?  
(Mt. 13:34-35)*

<sup>33</sup> Rashi rowapiintziro Jesúis roshiyakaawentziniri atziri okaatzi riyotairiri. Eepichokiinrika inkemathatawakero atziri, eepichokiini riyotairi. Inkemathaterorika, osheki riyotairi. <sup>34</sup> Ikaatzi ikenkithatakairi Jesúis roshiyakaawentatziiniri, te rooñaawontziniri. Iriima riyotaanewo, ikemathatakairi irirori.

*Romairiiro Jesúis tampyaa  
(Mt. 8:23-27; Lc. 8:22-25)*

<sup>35</sup> Okanta otsireniityaanake, ikantanairi riyotaanewo: “Jame amontyagai intatsikeronta.” <sup>36</sup> Irojatzi ryaatantanaari maawoini piyowenttariri. Risaikitaka ketziroini irirori pitotsiki, montyaakotaiyanaani. Tzimatsi oyaatanakeriri ikenakotanake otsipaki pitotsi. <sup>37</sup> Ari omapokakeri antawo tampyaa, otamakaatanake antawoite, okitaaganakero pitotsi, irootaintsi ritsitsiyakoteme. <sup>38</sup> Ikaakaitanakeri rimayira opataki pitotsi, rotziitotaka, ikantaitziri: “Yotaanarí ¡Atsitsiyakotatyé!” <sup>39</sup> Piriintanaka Jesúis, riñaanatanakero tampyaa, ikantziro: “¡Ataama pitampyaatake!” Ikantzitanakawo inkaare: “¡Pimairyaaate!” Awisanake otampyaatzi, mairyaatanai inkaare. <sup>40</sup> Ikantziri riyotaanewo: “¿Litaka pithaawantari? ¿Tema pawentaari Pawa?” <sup>41</sup> Osheki ipinkathatanakeri, ikantawakagaiyani ithaawankakiini: “¿Tsikama iitaka jirika romairyaatantawori tampyaa, romairyaatzitawo ejatzi inkaare?”

## 5

*Gadara-satzi raayiri peyari  
(Mt. 8.28-34; Lc. 8.26-39)*

<sup>1</sup> Rareetaka Jesús intatsikero inkaare, inampiki Gadara-satzi. <sup>2</sup> Iro raatakotapaakitziini, rishiyashitawakari raayiri peyari ipoñaakawo kitataarewoki, <sup>3</sup> ari risaikawaitzi irirori. Te raawyaitziri roosotantaitari kotsirotha. <sup>4</sup> Itzimpeshiro roosotantaitari iitziki eejatzi rakoki. Tekaatsi otsinampairine. <sup>5</sup> Rashi rowiro kiteesheriki eejatzi tsireniriki, ikenayetzi ochempiki, kitataarewoki, ikaimawaitzi, itowaitakeri mapisheta. <sup>6</sup> Ikanta iñaawakeri ripokake Jesús, rishiyashitawakari, rotziwerowashitawakari. <sup>7</sup> Antawoite ikaimapaake, ikantzi: “¡Jesús, Itomi Pawapero, te nokowi powashironkaina! ¿Tsikama pinkantenaka?” <sup>8</sup> Tema rotyaantapaakitziiri Jesús, ikantapaakeri: “¡Peyarí, piyaate!” <sup>9</sup> Ari rosampitanakeri: “¿Tsika piitaka?” Ari rakanake peyari, ikantzi: “Noita ‘Shekiyantzi’, osheki nokantaiyani.” \* <sup>10</sup> Eekero ikantanakitzi peyari: “Te nokowi potyaantena otsipaki nampitsi.” <sup>11</sup> Ari ipiyotaka tyonkaarikiini osheki chancho roshimotokawaitaiyini. <sup>12</sup> Ikantaiyini peyari: “Potyaantena chanchoki.” <sup>13</sup> Ikantanakeri Jesús: “Pimatero piyaate.” Shiyanka chancho impeetaki, mitaapaake inkaareki, thonkaka ripiinkake. Ikaatzi 2000 chancho.

---

\* **5:9** Kantakotachari jaka “Shekiyantzi”, irijatzira iitaitziri “Legión”. Piñaanatero isaawiki tsika rooñaawontaitziro osankenata janta: Mt. 26.53.

<sup>14</sup> Thaawaiyanakeni kempoyiiriri chancho, shiyanaka, thawetapaake nampitsiki, ikamantanakeri maawoini saikatsiri rowaneki. Pokanake maawoini raminero awisaintsiri. <sup>15</sup> Riyaatashitaitanakeri Jesús, iñagaitapaatziri raaganewo peyari. Risaikake, ikithaataawo, kameetha ikantanaa. Ithaawantapaakari iñagaitapaakerira. <sup>16</sup> Ikaatzi ñaakeriri inkaaganki ikamantawakeri pokayetaintsiri, ikantziri: “Pamineri jirika, iriira Jesús etsiyatakotakagairiri. Rowiinkake osheki chancho.” <sup>17</sup> Ikantaitanakeri Jesús: “Piyaatai, te nokowi pisaikimotena.” <sup>18</sup> Irojatzi rotetantanaari Jesús pitotsiki. Ikantawetawaari retsiyatatakotakaanewo: “Nokowi paanaina naaka.” <sup>19</sup> Rakanake Jesús, ikantziri: “Eero nayimi, piyaatai pisheninkaki. Pinkamantapairi pinkanteri: ‘Ineshironkataana Pinkathari, retsiyatatakagaana.’” <sup>20</sup> Ikanta raagawetari peyari, jatai inampiki jitachari Decápolis, ikamantapairi maawoini atziri, ikantapairi: “Retsiyatakotakagaana Jesús.” Riyokitziwentaitakeri ikemaitzirira ikamantantzi.

*Rishinto Jairo eejatzi tsinane terotzitakeriri iithaare Jesús*

*(Mt. 9.18-26; Lc. 8.40-56)*

<sup>21</sup> Ikanta ripiyaawo Jesús ipoñagaawo intatsikero. Ipiyowentawaari osheki atziri inkaarecheraaki. <sup>22</sup> Ari rareetapaaka jitachari Jairo jewatatsiri ipiyotaitapiintaga. Iñaapaakerira Jesús, rotziwerowashitapaakari, <sup>23</sup> ikantapaakeri: “Onkamatye nishintyo. Nokowi piyaate piterotantaiyaawo pakó, etsiyatakotaita.”

<sup>24</sup> Irojatzi riyaatantanaka Jesús, ari royaatanakeri osheki atziri, ranawiimatanakeri.

<sup>25</sup> Okanta tsinane osokaawaitachari, tzimakotake 12 osarentsi omantsiyawaitake, <sup>26</sup> osheki raawintaweetakawo, ithonkakero owaagawo ipinawentawo. Aminaashiwaitaka, eekero iyaatatzi omantsiyatzi. <sup>27</sup> Okemake iroori ikenkithatakoitziri Jesús, ikantaitzi: “Etsiyatakotakaantaneri rinatzi Jesús.” Osatekantanakari atziri okenashitanakeri itaapiiki, iterotzitakeri iithaare. <sup>28</sup> Okantashiretanake iroori: “Arika niterotzitakeri iithaare, ari netsiyatakotai.”

<sup>29</sup> Apathakerotanaka etsiyatakotanake osokaawaitaga. <sup>30</sup> Riyotzitanaka Jesús eenitatsi etsiyatakotakaantakeri ishintsinka, rosampitanakeri oyaayetakeriri, ikantziri: “¿Litaka terotzitakenawori noithaare?”

<sup>31</sup> Rakanakeri riyotaanewo, ikantzi: “¿Tema piñiri ranawiimatakemira atziri? Eekero pikantatzi: ‘¿Litaka terotzitakenawori noithaare?’ ” <sup>32</sup> Eekero raminanakitzi Jesús, iñaantyaariri terotzitakeriri iithaare.

<sup>33</sup> Okanta tsinaneka othaawantanakari Jesús, ompetawaitanaka. Tema iro retsiyatakotakaake. Iyaatashitanakeri, otziwerowashitapaakari, othawetakotapaaka. <sup>34</sup> Ikantanakero irirori: “Nishintó, etsiyatakotakagaimi pawentaane, kimoshire pinkantanaiya piyaatai, tema etsiyatakotaimi.”

<sup>35</sup> Tekera inkaateroota Jesús riñaanatziro, ritonkyotawakari poñagainchari ipankoki Jairo. Ikantapaakeri: “Kamakera pishinto. Eero poñaashirenkiri iyotaantaneri” <sup>36</sup> Ikanta ike-

mawakera Jesús ikantaitapaakeri, ikantanakeri Jairo: “Eero powashireta, pinkimoshirewentena naaka.” <sup>37</sup> Tekaatsi inkowe oyaaterine. Apatziro raanakeri Pedro, Jacobo, Juan irirentzi Jacobo. <sup>38</sup> Ikanta riyataake, areetaka ipankoki Jairo. Iñaapaakitziiri rakisheenkatake atziri riraakoiyawoni kaminkawo. <sup>39</sup> Kyaapaake Jesús, ikantapaakeri: “¿Iitaka piraantaiyarin? Te okami, imakoryaatzi.” <sup>40</sup> Thainkashire rowaitakeri Jesús. Romishitowapaakeri maawoini. Apatziro risaikanake ashitawori, eejatzi riyotaanewo. Ikyashitanakero romaryagaitakerowa eentsi. <sup>41</sup> Rotaiyawakotapaakero, riñaanatapaakero, ikantziro: “¡Talita cumi!” (akantziri apaanteki aaka: “Eentsi, pimpiriinte.”) † <sup>42</sup> Piriintanaawo eentsi, anashitanaawo. Tema tzimake 12 osarentsite, irootake anashiwaitantanaari. Riyokitziiwentanakero ikaatzi ñaakerori. <sup>43</sup> Ikantzi Jesús: “Pimpero owanawo.” Ikantanake eejatzi: “Te nokowi pinkamanteri atziripaini.”

## 6

### *Ripiyaawo Jesús Nazaret-ki (Mt. 13.53-58; Lc. 4.16-30)*

<sup>1</sup> Ikanta ripiyaawo Jesús inampiki, royaatairi maawoini riyotaanewo. <sup>2</sup> Okanta kiteesheri rimakoryaantaitari, riyotaantake Jesús ipiyotaitapiintaga. Riyokitziiwentaitakeri. Ikantaitzi ikemaitzirira: “¿Tsika ipookamat-sitawoka riyomatsitantari? ¿Iitaka yotaakeriri rantantawori kaari iñaapiintaitzi? <sup>3</sup> ¿Kaarima

---

† **5:41** Iro riñaawaitakeri Jesús, tema Aram-thato riñaanetari.

jirika kisaatapiintzirori inchakota? ¿Kaarima otomi María? ¿Kaaari irirentzipaini Jacobo, José, Judas eejatzi Simón? ¿Kaarima iritsiro tsipatakairi anampiki?” Ari opoñaawo kaari ikemisantantitari Jesú. \* <sup>4</sup> Ikantanake Jesú: “Rashi rowiro Kamantantaneri ikemisantitziri otsipaki nampitsi, te ikemisantitziri inampiki irirori risaikira isheninkapaini.” <sup>5</sup> Iro kaari okantanta rooñaawontero Jesú ishindsights inampiki. Te ishenitzi mantsiyari retsiyatatakairi riterotantyaari rako. <sup>6</sup> Antawo rowashiretakotakari kisoshirewaitatsiri, kaari kowatsine inkemisante. Iroowa riyaatantanakari ryotaantzi otsipaki nampitsi tzimayetatsiri janta.

*Rotyaantziri ryotaanewo  
(Mt. 10.5-15; Lc. 9.1-6)*

<sup>7</sup> Ikanta Jesú ipiyotakeri ryotaanewo ikaatzi 12. Ripasawyaaikeri ishindsights, raawayaantyaaariri irirori peyari. Rotyaantakeri, intsipatawakaanakya apitepaine. <sup>8</sup> Ikantakeri: “Eerowa paanake pithaate, powanawo, piyorikite, apatziro paanake pikotzi. <sup>9</sup> Eero paanake otsipa piithaare. Apatziro pizapato-tetanakya.” <sup>10</sup> Ikantawakeri eejatzi: “Pareetakyaarika pankotsiki arira pimaapiinte, irojatzi pawisantanakyaari otsipaki nampitsi. <sup>11</sup> Eerorika raapatziyaitawakemi, eerorika ikemisantitzimi, pawisapithateri. Potekanairo piipatsite piitziki, iro ryotantaityaari te ikemisantitziri Pawa. Iri rimaperote rowasanketaiteri paata, anaanakero rowasanketaitareri

---

\* <sup>6:3</sup> Jacobo, iriira iitaitziri eejatzi Santiago.

pairani Sodoma-satzi eejatzzi Gomorra-satzi. Imaperotatya.” <sup>12</sup> Ikanta riyataanake riyotaanewo Jesús ikantakeri atziripaini rookairo ikaariperowaitzi. <sup>13</sup> Retsiyatakotakaake raayiri peyari, retsiyatatakotakaake osheki mantsiyari ritziritantari oyeenka pankirentsí.

*Ikamantakari Juan omitsitsiyaatantaneri  
(Mt. 14.1-12; Lc. 9.7-9)*

<sup>14</sup> Areetakotakari pinkathari Herodes okaatzi rantakeri Jesús. Ikantaitzi: “Añagai Juan omitsitsiyaatantaneri. Piñeeri otzimi ishindsighta.” <sup>15</sup> Tzimatsi itsipa kantaintsiri: “Elías rini.” Ikantaitzi eejatzzi: “Aamaaka iri itsipa Kamantantaneri.” <sup>16</sup> Ikemake Herodes ikantaitakeri, ikantanake irirori: “Iri añagaatsiri Juan nithatzinkakaantakeri.” <sup>17</sup> Ipoñaantari ketziroini Herodes romonkyaakaantziri Juan, okantakaantziri Herodías, iinantawetari Felipe irarentzi Herodes. Iroowa iinantaari irirori Herodes. <sup>18</sup> Tema ikaminaawetatyari Juan, ikantziri Herodes: “Te onkameethate payiteri iina parentzi.” <sup>19</sup> Iro opoñaantari okisaneentziri Herodías, okowake owamaakaanteri. <sup>20</sup> Iro romonkyaantakariri ketziroini Herodes. Iri kantacha Herodes antawoite ipinkathatakeri Juan, riyotzi kameethashire rinatzi, kiteshire ikanta. Te rishinewetari rowamagaiteri. Okaatzi ikaminaawetariri, ikompitzimotakari Herodes. Ari reshiwentawetawo ikemisantziri. <sup>21</sup> Okanta otsipa kiteesheri, roimoshirenkawentawo Herodes itzimantakari pairani. Ripokaiyakeni iwinkatharentsite,

ripokake reeware owayeripaini Roma-satzi, ripokake Itzinkampaini Galilea-satzi. Rowaiyakani. <sup>22</sup> Ari okyaapaake ishinto Herodías rowaiyanira, omampayimotapaakari, okameethatzimotanakeri Herodes omampaane, okameethatzimotanakeri eejatzi itsipatakari rowaiyani. Ikantanakero Herodes: “Ari nompakemi oitarika pinkowakotenari. <sup>23</sup> Eero namatawitzimi, riyotzi Pawa imaperotatyá nokantzi. Iroorika pinkoweri nopinkathariwentziri, ari nompakemi niyanki.” <sup>24</sup> Iyaatashitanakero iniro, okantapaakero: “¿Oitaka nonkowakoteriri?” Okantanakero onaanate: “Pinkowakoteri iito Juan omitsitsiyaatantaneri.” <sup>25</sup> Ipiyapaaka mainawo, okantapaakeri: “Nokowi pimpenawo iito Juan, powakenawo pachakashetaki.” <sup>26</sup> Antawoite rowashiretanaka pinkathari. Tema maawoini ikemaitakeri inkaaganki ikantakerowa mainawo, tekaatsi inkenakaanairo, ontzimatye impero okowakeri. <sup>27</sup> Rotyaantake owayeri ramakeniri iito Juan. <sup>28</sup> Jatanake owayeri romonkyagaitakerira Juan, rithatzinkapaakeri, ramakotakero iito pachakashetakiki. Ipakoitapaakero mainawo, aanakeniro iniro. <sup>29</sup> Ikanta ikemaiyakeni riyotaanewo Juan-ni, pokaiyakeni, ikitatairia.

*Rowakaari Jesús 5000 shirampari  
(Mt. 14.13-21; Lc. 9.10-17; Jn. 6.1-14)*

<sup>30</sup> Piyaawo rotyaantanewo Jesús, piyotaiyapaani maawoini risaikira, ikamantapairi okaatzi rantayetakeri. <sup>31</sup> Eekero ripokatzi atziri, piyayetacha itsipa. Te onkantaiya

rowaiya Jesús. Iro ikantantariri riyotaanewo: “Jame aate ochempiki, amakoryaaawakeeta eepichokiini.” <sup>32</sup> Otetanaka pitotsiki, jatanake. <sup>33</sup> Iri kantacha, osheki aminakotawakeriri riyataanakera, riyotawakeri. Shiyaiyanakan ikenanake awotsiki, ipoñaanakawo nampitsiki. Iri etakawo rareetaka, piyotaiyapaakani. <sup>34</sup> Ikanta rareetapaaka Jesús, iñaapaatziiри ipiyotaiyani. Retakotapaakari. Roshiyakari oweja eerorika itzimi kempoyiiriri. Riyotaapairi eejatzi. <sup>35</sup> Ari otsireniityaanake, ripokashitapaakeri riyotaanewo, ikantapaakeri: “Yotaanari, asaikatziira ochempiki. <sup>36</sup> Pipakairo piyotaantz, riyaataita atziripaini nampitsiki ramanante royaari.” <sup>37</sup> Ikantanakeri Jesús: “Pimperi eeroka royaari.” Ikantzi riyotaanewo: “¿Pikowatziima niyaate namanantakite nowakayaariri? Osheki owanawontsi, eero rimonkaata koriki nowakaantyaariri maawoini, osheki ipinatyaaari.” † <sup>38</sup> Ikantanake Jesús: “¿Tsika okaatzika pan ramakeri atziripaini? Piyaate paminakitero.” Jatanake raminakitziro, ikantzi: “Eenitatsi okaatzi 5 pan, apite shima.” <sup>39</sup> Ikantzi Jesús: “Poisaikeri maawoini atziri onatsiryAAPANKAATAKERA kishipeenkashi, pinashiyetyaaari poisaikeri.” <sup>40</sup> Rimatakero. Eenitatsi inashitainchari risaikayetake ikaatzi 100 atziri, eejatzi ikaatzitaka itsipa 50 atziri. Ari ikantakeri roisaikakeri maawoini. <sup>41</sup> Ikanta raakotakero Jesús 5 pan itsipataakero apite shima, aminanake jenoki inkiteki,

---

† **6:37** Kantakotachari jika “osheki ipinatyaaari” irojatzi ikantaitziri inkaaterika 200 denario.

riwetharyaanakari Ashitariri. Itzipetowakero pan, ipakeri riyotaanewo, rowawisaakeniri itsipa atziripaini. Eejatzi ikantakeri shima, rantetakari maawoini.<sup>42</sup> Rowaiyakani maawoini, kemaneentaiyakan. <sup>43</sup> Yeekiyetai kantziriki okaatzi 12 rowagaantakari. <sup>44</sup> Ikaatzi ishekitzi 5000 shiramparipaini owainchari.

*Ranashaatantawo Jesús inkaare  
(Mt. 14.22-27; Jn. 6.15-21)*

<sup>45</sup> Ikantanairi Jesús riyotaanewo: “Petaiyaawo pimontyagai nampitsikinta Betsaida.” Ikantanakeri piyowentakariri: “Piyaataira pipankoki.” <sup>46</sup> Ikanta riyayetai maawoini atziri, tonkaanake Jesús ochempiki ramana. <sup>47</sup> Tsirentanake, riweyaakotaka riyotaanewo niyankyaaki inkaare rimontyaakotaiyaani. Apaniroini risaikanake Jesús ochempiki, <sup>48</sup> raminakotakeri riyotaanewo, shintsiini rikomataiyini oipiyakotakeri tampyaa. Okanta okiteeshetzimatake, riyaatashitairi, ranashaatan-tanaawo inkaare, ikenashitapairi itaapiiki, oshiyakawo rawisanakityeerime. <sup>49</sup> Irojatzi iñaantaitawaari, roshiyakaatziiri iri shiretsi, kaimaiyanakeni, <sup>50</sup> maawoini rominthaaawakeri iñaawairira. Ikantapaakeri Jesús: “Naaka pokaatsi, eero pithaawashita, tontashire pinkantya.” <sup>51</sup> Otetapaawo pitotsiki, awisainkatanake tampyaa. Riyokitzliwentanakeri. <sup>52</sup> Tema tekera riyotakotziroota roshekyaatnakawori Jesús pan, okantakaakari ikisoshirewaitzi.

*Retsiyatakotakaantzi Jesús Genesaret-ki  
(Mt. 14.34-36)*

<sup>53</sup> Irojatzi rareetantakari inampiki Genesaret-satzi. <sup>54</sup> Iro raatakotapaakitziini, riyoitawakeri Jesús. <sup>55</sup> Ikamantawakaiyanakaní nampitawori janta, ramakotakeri mantsiyari romaryaaamentoki. Tsikarika risaiki Jesús, ari ramakoitziniri mantsiyari. <sup>56</sup> Ari ikantzitaitari ikenayetzira oryaaniki nampitsi, nampitsi antawo, eejatzi owaantsiki, rowakoitziniri mantsiyari awotsiki, ikantaitziri: “Pishinetya riterotawakero piithaare.” Maawoini terotzitakeriri iithaare etsiyatakoyetai.

## 7

*Owaariperoshiretziriri atziri**(Mt. 15.1-20)*

<sup>1</sup> Ikanta ripokaiyakeni Fariseo itsipatakari Yotzinkaripaini, ipoñaakawo Jerusalén-ki. Ipiyowentapaakari Jesús. <sup>2</sup> Ari iñaapaakeri riyotaanewo Jesús te rantero rametapiintari ikiwaakota arika roya. Ikishimatapaakeri. <sup>3</sup> Okaatzi rantapiintziri Fariseo-paini, eerorika ikiwaakota, eero rowaa. Iro rametari pairani icharine: Arika roya ontzimatyé inkiwaakotawakya, inkitewathatantyaari. <sup>4</sup> Arika rareetaiya ramanantawitzira, tekera rowapaiyaata, inkiwaakoperotapaiya. Te apatziro rametawo jiroka, ikiwayetziro eejatzi riramento, rowamento, ronkotsimento, rimaamento, maawoini. <sup>5</sup> Iroowa rosampitantakariri Jesús, ikantziri: “¿Oitaka ipeyakotantakawori piyotaanewo riyotagairi pairani acharine? Noñaapaakeri rowaiyani, te ikiwaakota.” <sup>6</sup> Rakanakeri Jesús, ikantziri:

“Owapeyimotantaneri pinaiyini. Eeroka ikenkithatakotake pairani Isaías, rosankenatake, ikantzi:

Ipaanteki ipinkathawaitakena atziripaini.  
Temaita inkenkithashiryaakotaina ishireki.

<sup>7</sup> Raminaashiwaita rotziwerowa ipinkathawetana,

Riyotaantashitawo rameyetari irirori.

<sup>8</sup> Pipeyakotakero eeroka Inintakaantanewo Pawa, pantashitakawo rametari acharineni. Pikiwayetziro powamento, piramento. Osheki okaatzi pantashitakari.”

<sup>9</sup> Ikantanakeri eejatzi: “Iroowa pantaperotakeri pameyetari, pithainkanakero Inintakaantanewo Pawa. <sup>10</sup> Jiroka rosankenare Moisés-ni, ikantzi:

Pimpinkathateri ashitzimiri.

Ikantzi eejatzi:

Ontzimatye rowamagaiteri kishimawaitziriri ipaapate.

<sup>11</sup> Iro kantacha pikantapiintzi eeroka: ‘Ankashaakairirika ayorikite Pawa, ontzimatye amperi. Onkantawetakya añaeri rashironkaawaitya apaapate.’ <sup>12</sup> Ari

pikantakari eeroka, piyotaashitakari atziripaini rithainkantzi, te retakotari ipaapate.

<sup>13</sup> Pantashitakawo rameyetari pairani picharine, iroowa pithainkantakawori riñaane Pawa. Ari pikantapiintatyapantziro oshiyawori jiroka.”

<sup>14</sup> Ikaimakeri Jesús maawoini piyotainchari, ikantziri: “Pinkemisantaiyení maawoini, pinkemathatantyaawori nonkantemiri.

<sup>15</sup> Okaatzi rowaitari, te owaariperotziro

ashire. Irooma okaatzi omishitowiri inthomoiki, iroowa owaariperotzirori ashire. <sup>16</sup> Powayempitayaawo jiroka.” <sup>17</sup> Ikanta ryaataiyaini atziri, kyaapai Jesús pankotsiki. Ari rosampitakeri riyotaanewo, ikantziri: “¿Oitaka poshiyakaawentakeri?” <sup>18</sup> Rakanake Jesús, ikantziri: “¿Tema pikemathatawakero eeroka? ¿Te piyote eeroka te owaariperotero ashire okaatzi rowaitari? <sup>19</sup> Tekaatsi onkantero ashire, apatziro okeniro asheetoki, irojatzi ishitowantaiyaari.” Iroowa riyotaantakeri Jesús, tema te owaariperotantzi okaatzi rowaitari. <sup>20</sup> Ikantanake eejatzi: “Arika antakayeri ashinko kaariperori, iroowa owaariperotzirori ashire. <sup>21</sup> Tema ashireki opoñaawo jiroka: kaariperori kenkithashiryagaantsi, kaari kinataantsi, mayempitaantsi, tsitokaantsi, <sup>22</sup> koshitaantsi, shampsitaantsi, kaariperoshiretaantsi, amatawitaantsi, mayempikyaataantsi, samakoneentaantsi, kishimataantsi, asagaawentaantsi, tzimaityaashiwaitaantsi. <sup>23</sup> Okaatzi ikenkithashiretapiintari atziri kaariperori inatzi, iroowa rowaariperotantawori ishire. Tema ishireki opoñaawo jirokapaini.”

*Awentaari Pawa Sirofenicia-sato  
(Mt. 15.21-28)*

<sup>24</sup> Ikanta ikenanake Jesús nampitsiki jitachari Tiro, irojatzi Sidón-ki. Ari risaikapaake pankotsiki, te ikowaweta inkemakoiteri. Temaita rimanakota. <sup>25</sup> Eenitatsi janta tsinane raayiri peyari ishinto. Okemakotawakeri iroori Jesús, ipokashitakeri, otziwerowashitapaakari.

<sup>26</sup> Jiroka tsinane kaari Judá-ite, opoñaawo iroori otsipaki nampitsi oita Sirofenicia. Okantapaakeri: “Jesús, petsiyatakotakagainawo nishintyo, raagatziiro peyari.” <sup>27</sup> Rakanakero irirori: “Paata tsinané. Ikantaitzi pairani: Te raapithaitziri eentsi rowanawo impaiteri otsitzi royaawo, apatziro rowawo eentsi irojatzi inkemantakya.” \* <sup>28</sup> Akanakeri tsinane, okantziri: “Imaperotatyá pinkatharí pikantakeri. Iro kantzimaitacha ikatziyapiinta irirori otsitzi jantyaatsikaini, rowayetawo rookagaantayetziri eenchaaniki.” <sup>29</sup> Ikantzi Jesús: “Imaperotatyá pikantakeri. Piyaatai, ari piñaapairo pishinto etsiyatakotai iroori.” <sup>30</sup> Okanta iyaatai tsinane opankoki, oñaapairo ishinto omaryaa imaamentoki, etsiyatakotai.

### *Retsiyatakotakagairi Jesús witakempitari*

<sup>31</sup> Ari rawisanake Jesús risaikawetapaakaga nampitsiki Tiro, ikenanairo Sidón-ki, Decápolis-ki irojatzi rareetantaawo Galileaki. <sup>32</sup> Ramaitakeniri witakempitari, masontziwaanteri rini ejatzti. Ikantaitapaakeri: “Jesús, piterotantawakyaari pako.” <sup>33</sup> Raanakeri Jesús jantyaatsikaini, rosagaantantakari rako ikempitaki, ritziritantakari ishimore ineneki. <sup>34</sup> Aminanake jenoki inkiteki, rowiñeenkatanaka rañaanake Jesús, ikantzi: “¡Efata!” (Akantziri apaanteki aaka: “Piwitaryagaiya.”) <sup>35</sup> Irojatzi iwitaryaantanakari ikempita, te

---

\* <sup>7:27</sup> Iriira roshiyakaawentaitzi Judá-ite, oshiyariri eenchaaniki. Iriima kaari Judá-itetatsine iriira oshiyariri otsitzi.

imasontziwaantetanai eejatzi, wetsikanaawo riñaawaitanai kameetha. <sup>36</sup> Ikantawetakari Jesús: “Eerowa pithawetakotana.” Te ikemisantzimaitari, thawetanake atziripainiki. <sup>37</sup> Riyokitziiwentaitanakeri Jesús, ikantaiyini: “¿Oitaka okameethatantari rantziri jirika? Ikemakagairi witakempitari, riñaawaitakagairi eejatzi.”

## 8

### *Rowakaari Jesús atziripaini ikaatzi 4000 (Mt. 15.32-39)*

<sup>1</sup> Ikanta ipiyotaiyani osheki atziri, thonkapaaka rowanawo. Ikaimakeri Jesús riyotaanewo ikantziri: <sup>2</sup> “Antwoite netakoshiretakari atziripaini. Itsipatakena okaatzi mawa kiteesheri, thonkapaaka rowanawo. <sup>3</sup> Arika notyaantairi, ari aakeri ritashe awotsiki, tema tzimayetatsi poñagainchari intaina.” <sup>4</sup> Rakanake riyotaanewo, ikantanakeri: “Ochempikira asaiki ¿tsika ayeka owakayaariri?” <sup>5</sup> Rosampitanakeri Jesús, ikantziri: “¿Eenitatsi pan?” Ikantaiyini irirori: “Eenitatsi okaatzi 7.” <sup>6</sup> Ari roisaikakaantanakeri Jesús maawoini atziri kipatsiki. Raakero pan okaatzi 7, riwetharyaawentanakawo, itzipetowakero, ipakeri riyotaanewo rowawisaakeniri atziripaini irirori. <sup>7</sup> Tzimitacha eejatzi shiwareki. Ri-wetharyaawentakari, ipitakari eejatzi atziripaini. <sup>8</sup> Rowaiyakani maawoini, kemaneentaiyakani. Yeekitai tzimagaantapaintsiri kantziriki okaatzi 7. <sup>9</sup> Maawoini shiramparipaini owainchari ikaataiyini 4000. Rotyaantayetairi inampiki.

**10** Ari rotetanaawo Jesús pitotsiki itsipatanaari riyotaanewo, montyaakotanaawo intatsikero nampitsiki oita Dalmanuta.

*Ikowakotitziri Jesús ritasonkawentante  
(Mt. 16.1-4; Lc. 12.54-56)*

**11** Ari ripokaiyapaakeni Fariseo, riñaanaminthatapaakeri Jesús, ikowi iñeeri ritasonkawentante, iro riyotantyaari imaperotatyaa opoñaawo itasorenka jenoki inkiteki, tema iñaantashiretyaari. **12** Rañaashiryaaanake Jesús, ikantziri: “¿Oitaka ikowantari iñeena nitasonkawentante jirikapaini? Eeromaita noñaayiri. Imaperotatyaaaga.” **13** Piyanaawo Jesús, montyaakotanaawo.

*Kachotakairori iwaane Fariseo  
(Mt. 16.5-12)*

**14** Ari imaisantanakero riyotaanewo ragaantanakyaame pan, apaani ragaantamatsitanaka. **15** Ikantzi Jesús: “Paamaawentyaawowa kachotakairori iwaane Fariseo eejatzi rash Herodes.” **16** Ari ikantawakaanaka riyotaanewo: “Kaari amantanaka pan.” **17** Riyotake Jesús okaatzi ikantawakaakari riyotaanewo, ikantziri: “¿Oitaka piñaanatawakaawentari: ‘¿Kaari amantaka pan, kaari amantaka pan?’ ¿Tema pikemi? Kisoshire pikantaka.” **18** Tzimawetacha poki te piñaante, tzimitawetacha pikempita te pinkeme. ¿Tema poshiretawo noshekyaantakawori pan? **19** Tema tzimawetacha pan okaatzi 5, nowakaaka isheki atziri ikaatzi 5000. Powiitairo okaatzi tzimagaantapaintsiri. ¿Tsika okaatzika kantziri yeekitaatsiri?” Ikantaiyini: “Okaatzi 12 kantziri.”

<sup>20</sup> “Eejatzi nokantakero, kaawetachari 7 pan, rowaiyakani isheki atziri ikaatzi 4000. Powiitairo tzimagaantapaintsiri. ¿Tsika okaatzika kantziri piyeekitairi?” Ikantaiyini: “Okaatzi 7 kantziri.” <sup>21</sup> Ikantanakeri: “¿Tekerama piyotakotziroota?”

### *Rokiryaakagaitairi mawityaakiri*

<sup>22</sup> Areetaka Jesús nampitsiki Betsaida. Ramaitakeniri mawityaakiri, ikantaitapaakeri: “Piterotantawakyaari pako.” <sup>23</sup> Ikanta Jesús, rotaiyawakotanakeri. Raanakeri othapiki nampitsi. Reewaakitakeri, roshyeyookitantakari rako. Rosampitzimaitari, ikantziri: “¿Koñaatanai pamine?” <sup>24</sup> Aminanake, ikantzi: “Aminawetaana, noñaawetaari atziri, te ikoñaaperotzimaita, roshiyashitakawo inchato.” <sup>25</sup> Rapiitanairi riterookitziri, ikantairi: “Pamine iroñaaka.” Okiryaanake, koñaatanai ramini intaina, iñaanairo maawoini. <sup>26</sup> Rotyaantairi, ikantawairi: “Eero pikenanai nampitsiki, tera nokowi pinthawetakotena.”

### *Yotake Pedro: Jirika Jesús, Cristo rinatzi (Mt. 16.13-20; Lc. 9.18-21)*

<sup>27</sup> Ikanta rawisanake Jesús itsipatanaari riyotaanewo ikenake Cesarea-ki inampipainiki Filipos. Okanta niyanki awotsi rosampitakeri riyotaanewo, ikantziri: “¿Oitaka ikenkithashire-takotanari atziripaini?” <sup>28</sup> Ari rakaiyanakeni riyotaanewo, ikantzi: “Ikantaitaziimi Juan-ni omitsitsiyaatantaneri pinatzi, ikantaitzimi eejatzi Eliás pinatzi. Eenitatsi itsipa kantayetzimiri Kamantantanerira piriintaachari.” <sup>29</sup> Ari rosampitanakeri irirori, ikantanakeri: “¿Oitaka

pikenkithashiryaakotanari eeroka?” Ari rakanake Pedro: “¡Eeroka, Cristo pinatz!”  
 30 Ikantzi Jesús: “Paataga pithawetakotzitana.”

*Ikenkithatakotziro Jesús inkame  
 (Mt. 16.21-28; Lc. 9.22-27)*

31 Ari retanakawo Jesús ikamantziri riyotaanewo onkaate awishimoterine, tema iri jitainchari Itomi Atziri. Ikantziri: “Osheki rowasanketaiten. Osheki inkisaneentena Itzinkamipaini, eejatzi reewarerepaini Imperatasorentsitaarewo, eejatzi Yotzinkaripaini. Rowamaakaantena. Iro onkaatakeme kiteesheri mawa, añagaana.” 32 Ari ikantakeri, te rimaniro. Ikanta Pedro, raanakeri Jesús jantyaatsikaini, ikowaweta inkaminairime. 33 Ripithokapithatanakari, raminanakeri riyotaanewo, ikisathatanakeri Pedro, ikantanakeri: “¡Piyaate Satanás! Te poshiretawo eeroka inintakaantziri Pawa, apatziro poshiretawo ikowayetziri atziripaini.” 34 Ikaimanakeri Jesús piyowentakariri, ikaimitanakari eejatzi riyotaanewo, ikantakeri: “Tzimatsirika kowatsine intsipatena, rookero ikowashiwaitari irorori. Onkantawetya inkentakoiteri, intsipataina naaka. 35 Ikaatzi antashiwitawori iñaamatashitari, ari impeyashitaiya. Irooma ikaatzi kamawentenane, okantakaantziro ikemisantziro Kameethari Ñaantsi, aritake rawisakoshiretai. 36 Aminaashiwitaga iñiilo oshekitzimotziri rashaagawo tzimawetachari kipatsiki, arira impeyashitaiyaawo rañaamento. 37 ¿Arima ripinawentaiya eero iñaantaawo impeyashitaiya? 38 Ikaatzi kaaniwentanari inkenkithatakotena

kaariperoriki atziri, atake nimatairi naaka paata nonkaaniwentairi arika nipyai namairo rowaneenkawo Ashitanari nontsipataiyaari maninkaripaini, tema naaka Itomi Atziri.”

## 9

<sup>1</sup> Irojatzi ikantantanakari eejatzi Jesús: “Pikaataiyakenira jaka, tzimatsira apawopaini eero ikamita irojatzi iñaantakyaawori ishintsinka Pawa tsika ikanta ipinkathariwentantzi. Imaperotatya.”

### *Rishipakiriimotziri Jesús riyotaanewo (Mt. 17.1-13; Lc. 9.28-36)*

<sup>2</sup> Okanta awisanake kiteesheri okaatzi 6. Tonkaanake Jesús ochempiki, raanakeri Pedro, Juan, eejatzi Jacobo. Ari rishipakiriimotakeri.

<sup>3</sup> Kitamaaniki okantanaka iithaare, tekaatsi oshiyakairi okitamaatanake. <sup>4</sup> Iñaatziiri Elías itsipatapaakari Moisés, ikenkithawaitakaa-paakeri Jesús. <sup>5</sup> Riñaawaitashitanaka Pedro, ikantanakeri Jesús: “Yotaanari, imaperotatya okameethatz pamaiyakenani jaka. Kameetha niwetsikaiyemini mawa pankoshetantsi: apaani pashi eeroka, apaani rashì Moisés, apaani rashì Elías.” <sup>6</sup> Tema ithaawaiyanakitziini, irootake riñaawaitashitanakari. <sup>7</sup> Irojatzi ipokantapaaka menkori itsimankakotapaakeri. Ikematzi ikantaitzi: “Notomi rinatzi jirika netakokiperotari, pinkemisanteri.”

<sup>8</sup> Raminaperowetanaari, te iñaanairi, apatziro Jesús.

<sup>9</sup> Ikanta roirinkaiyaani ochempiki, ikowakotakeri eero ikamantantziro okaatzi

iñaakerira irojatzi paata arika rañagai. Tema jirika Itomi Atziri ari rañagai inkamawetakyaarika.

**10** Iro kaari ithawetakotantari, iro kantacha osheki rosampitawakagaiyakani irirori tsika oita ikantakotziri Jesú, arika rañagai inkamawetakyaarika.

**11** Irojatzi rosampitaktariri, ikantziri: “¿Oitaka ikantakotziri Yotzinkaripaini iri jewatapaintsine Elías ripoke?”

**12** Ari rakanake Jesú, ikantziri: “Imaperotaty, iri jewatapaintsine Elías ripoke, rowameethatantapaake.”

¿Tsika okantzika rosankenatakoitakenari pairani? Tema okantatzi: ‘Jirika Itomi Atziri, osheki rithainkawaitaiteri.’

**13** Pinkeme, ari pokake Elías. Osheki ikoshekaitakari, rimonkaatakerokaatzi rosankenatakoitakeriri.”

*Rowawisaakotziri Jesú eentsi raayiri peyari  
(Mt. 17.14-21; Lc. 9.37-43)*

**14** Ikanta rareetaawo Jesú rookanakeri riyotaanewo, iñaapaatziiri ipiyowentari osheki atziri itsipatakari Yotzinkariite riñaanaminthatziri.

**15** Ikanta iñaawairi ripokai Jesú, riyokitziiwentawairi, rishiyanaaka riwethatawaiyaari.

**16** Rosampitapaakeri Jesú, ikantziri: “¿Itaka piñaanatakotziriri?”

**17** Akanake apaani, ikantanake: “Yotaanari, namatziumiri notomi raayiri peyari, te inkantaiya riñaawaitai.

**18** Ripokashitapairirika, osheki romposakaawaitari kipatsiki. Ishimorewaantewaitakairi, ratsikaikiwaita, ikisotakairi. Nokantawetakari piyotaanewo rowawisaakotainari, te rimatziri.”

**19** Rakanake Jesú, ikantanake: “Te pinkemisantaiyeni eeroka.

¿Tsika onkaateka piyote? Pamakenari jakaaentsi.”<sup>20</sup> Ramaitapaakeniri. Ikanta peyari iñaawakeri Jesús, antawoite rompetatakanakareentsi, tyaanake isaawiki, ripinaawaitanakakipatsiki, ishimorewaantewaitanake.  
 21 Rosampitanakeri Jesús ipaapate eentsi, ikantziri: “¿Tsikapaiteka retaka peentsite?” Ikantziri: “Rashi rowiro eeniro ikaatzinitzi.  
 22 Ritaakaawaitari paampariki, ripiinkawaitizeejatzi ñaaki, ikowi rowamairime. Kantacharikapineshironkatena, pimatero.”<sup>23</sup> Ikantziri Jesús: “¿Oitaka pikantantari ‘Kantacharika...?’” Arika pinkemisantanai, aritake imatakya maawoini.”  
 24 Irojatzi ikaimantanakari antawoite ipaapate eentsi, ikantanake: “Kemisantawetachana, terikanokemisantaperotzi, pinkemisantakaaperotaina eeroka.”<sup>25</sup> Eekero iñaatzi Jesús ripokaiyapaakeni atziri, ikisathanakeri peyari, ikantanakeri: “Pitainkapithateri eentsi, te nokowi pipiyashiterieejatzi.”<sup>26</sup> Antawoite ikaimanake peyari. Ikamimatakanakeri eentsi. Osheki kantanaitsiri: “Kamake eentsi.”<sup>27</sup> Rakathawakotanakeri Jesús, ipiriintakeri. Añaanai.  
 28 Ikanta ikyappaake Jesús pankotsiki, ari rosampitakeririyotaanewo apaniroini, ikantziri: “¿Litaka kaarinimatantari naaka nowawisaakoteri?”<sup>29</sup> Ikantziri Jesús: “Imaperotatyai shintsitzi jirika peyari, okowatyaaga ankamaityaawo amaña, atziwentyaeejatzi.”

*Rapiitairo Jesús ithawetakota inkamimotante  
(Mt. 17.22-23; Lc. 9.43-45)*

<sup>30</sup> Ikanta rowaaganaawo Jesús, ikenanai Galilea-ki. Te ikowi inkemakoteri atziripaini.

31 Riyotaayetziri riyotaanewo, ikantziri: “Irootaintsi raakaantaiteri Itomi Atziri, ritsitokaiteri. Awisawetakyaarika mawa kiteesheri, aritake rañagai eejatzi.” <sup>32</sup> Iro kantzimaitacha tera riyotawakero okaatzi ikantawetariri. Tekaatsi kowatsine rosampiteri.

*Tsika itzimi iriiperotatsiri  
(Mt. 18.1-5; Lc. 9.46-48)*

33 Areetaiyaani Capernaum-ki. Ikanta risaikaiyapaini pankotsiki, rosampitakeri Jesús, ikantziri: “¿Oitaka pikantawakaari inkaaganki awotsiki?” <sup>34</sup> Ari imairetaiyakeni irirori. Tema ikantawakaawentatyaaawo awotsiki tsika itzimi iriiperotatsiri. <sup>35</sup> Saikanake Jesús, ipiyotakeri riyotaanewo ikaatzi 12, ikantziri: “Arika pinkowe piriiperote, poshiyakotaari imperataarewo, te ipinkathariwentantzi irirori.” <sup>36</sup> Ramake eentsi risaikaiyakeni, ithomaakeri, ikantzi: <sup>37</sup> “Inkaate aakoterone nowairo ikemisantaana, arika raakameethatairi oshiyariri jirika eentsi, naakaga raakameethatake. Ari okantari eejatzi, arika raakameethatakena naaka, oshiyakawo iri raakameethatz otyaantakenari jaka.”

*Aritake akaatziri kaari kisaneentairi  
(Lc. 9.49-50)*

38 Ari ikantanake Juan: “Yotaanari, noñaake chapinki atziri aakotzirori piwairo, rowawisaakotziri raayiri peyari. Te añiiri ankaateri jaka, nipakaakaakeri.” <sup>39</sup> Ikantzi Jesús: “Eero pipakaakairime. Tema ikaatzi tasonkawentantsiri raakotziro nowairo, eero ikishimataana paata. <sup>40</sup> Tema aritake akaatziri

kaari kisaneentairi. <sup>41</sup> Arika ineshironkaitemi raakoitero nowairo, inkantaite: ‘Nompakoteri ñaa rashitaari Cristo.’ Iri ripinaitairi paata. Imaperotatya.”

*Eero pantakaantziro kaariperori  
(Mt. 18.6-9; Lc. 17.1-2)*

<sup>42</sup> “Tzimatsirika antakaakerine kaariperori oshiyakariri jirika eentsi rawentaana, ari rowasanketaitakeri. Iro kameethatatsi inthataiteniri mapi ikentsiki, rowiinkaiteri inkaareki. <sup>43</sup> Iroorika pako pantantapiintawori kaariperori, pipakairo pawisakotantaiyaari, oshiyaawo pithatzinkatyerome pako, piyaaponchokitantaiyaari inkiteki. Te okameethatzi otzimawetaga apite pako iro piñaantaiyaawori paata rookaitaimi sarinkaweniki pashi powaatyeero pitagaiya, <sup>44</sup> janta te ikaamanetapai chowitsi, te itsiwakanetapai paampari ejatzi. <sup>45</sup> Iroorika piitzi pantantapiintawori kaariperori, pipakairo pawisakotantaiyaari, oshiyaawo pithatzinkatyerome piitzi, piyaaponchokitantaiyaari inkiteki. Te okameethatzi otzimawetaga apite piitzi iro piñaantaiyaawori paata rookaitaimi sarinkaweniki pashi powaatyeero pitagaiya, <sup>46</sup> janta te ikaamanetapai chowitsi, te itsiwakanetapai paampari ejatzi. <sup>47</sup> Iroorika poki pantantapiintawori kaariperori, pipakairo pawisakotantaiyaari, oshiyaawo pinkithoryaatyerome poki, piyaapityaakitantaiyaari inkiteki. Te okameethatzi otzimawetaga apite poki iro piñaantaiyaawori paata rookaitaimi sarinkaweniki pashi powaatyeero pitagaiya, <sup>48</sup> janta te ikaamanetapai chowitsi, te itsiwakanetapai

paampari eejatzi. <sup>49</sup> Tema paampariki iñaantaitantemi maawoini, roshiyakagaitemi katyori. <sup>50</sup> Kameetha iwetsika tziwi okatyotzi, arika rowaitaitero tsikarika oita, eero okameethatai inkatyokantaityaawo. Ontzimatye poshiyaawo eero ka tziwipero, paapatziyawakagaiya, te opantawo pintzimawentawakaya.”

## 10

*Te okameethatzi pookero piina*

*(Mt. 19.1-12; Lc. 16.18)*

<sup>1</sup> Ikanta rowaaganaawo Jesús riyaatero Judea-ki, ikenanakero intatsikero Jordán. Ipiyowentawaari osheki atziri. Retapaawo riyotaayetapairi ikantapiintzirowa.

<sup>2</sup> Ari ripokake Fariseo, rosampitapaakeri Jesús ikowi rikompitakayaarime, ikantapaakeri: “¿Shinetaantsitatsima atziri rookero iina?”

<sup>3</sup> Rakanake Jesús, ikantanakeri: “¿Oitaka inintakaantziri Moisés-ni?” <sup>4</sup> Ikantaiyini irirori: “Rishinetakaantziro Moisés-ni ookero aina arika impaitairo osankenatakotaga jokawaka-gaantsi.” <sup>5</sup> Ari rakanake Jesús, ikantanakeri: “Okantakaantziro te pikemisanetzi, iro rishinetantakemirori jiroka. <sup>6</sup> Tema pairani etantanakari riwetsikantzi Pawa, Riwetsikake shirampari eejatzi tsinane.

<sup>7</sup> Iro rontsiparyantariri atziri ashitariri, om-poñaantyaari raye iina,

<sup>8</sup> Apaani ikantanaa raawakaana.

Te apite atziri rine, apaani ikantanaawo. <sup>9</sup> Iroowa eero okantanta rontsiparyagaiyaawo atziri itsipatakaariri Pawa.”

<sup>10</sup> Ikanta risaikaiyini pankotsiki, rosampitairi riyotaanewo okaatzi ikantakeri, <sup>11</sup> ikantanake Jesús: “Inkaate jokerone iina, arika ragai ot-sipa tsinane, imayempiwentakero retawetari ket-ziroini. <sup>12</sup> Ari okanta tsinane arika ookeri oime, agairika itsipa shirampari, mayempitake eejatzi.”

*Ritasonkawentziri Jesús eentsipaini  
(Mt. 19.13-15; Lc. 18.15-17)*

<sup>13</sup> Ari ramaitakeniri Jesús eentsipaini, ikowitzi riterotantyaari rako. Ikanta riyotaanewo Jesús ikisathatakeri amayetziriri eentsi. <sup>14</sup> Te inimotanakeri Jesús iñaakeri, ikantziri: “Pishineteri eentsipaini ripokashitenata. Eero pithañaana. Maawoini oshiyaiyaarine eentsi, iri ñagairone ipinkathariwentantzi Pawa. <sup>15</sup> Imaperotatyá, eerorika ipinkathatziri Pawa roshiyakotaari eentsipaini, eerowa iñiiro ipinkathariwentantzi.” <sup>16</sup> Ithomaawakeri eentsipaini, rotzimikapatziiyetakeri, ritasonkawentayetakeri.

*Mainari ashaagantachari  
(Mt. 19.16-30; Lc. 18.18-30)*

<sup>17</sup> Iro rawisantanaiyaarime Jesús, rishiyashitakari mainari, rotziwerowashita-paakari, rosampitapaakeri: “Kameethari Yotaantanerí, ¿oitaka nantairi noñaantaiyaawori añagaantsi kantaitaachane?” <sup>18</sup> Ari rakanakeri Jesús, ikantziri: “¿Oitaka pikantantanari: ‘Kameethari pinatzi?’ Apatziro ikan-takaawo Pawa ikameethatzi, tekaatsi itsipa. <sup>19</sup> Piyotakotakeroma Inintakaantaitziri: Eero pitsitokantzi.

Eero pimayempitzi.  
 Eero pikoshitzi.  
 Eero pithaiyakotanta.  
 Eero pamatawitantzi.  
 Pimpinkathateri ashitzimiri.”

<sup>20</sup> Rakanake irirori, ikantzi: “Yotaantanerí, nithotyaakero maawoini irojatzi netanakawo pairani eeniro nokaatziiinitzi.” <sup>21</sup> Raminanakeri Jesús, retakotanakari, ikantziri: “Eenitatsi kowapainchari kaari pantzi. Piyaataate pipankoki, pimpimantero maawoini pashitari, pimpashityaari ashironkainkari. Ari piñagairo pinintagaiya jenoki inkiteki. Pipoke, poyaatena.” <sup>22</sup> Ikanta ikemawake, okantzimoneentanakari. Owashire ikanta ripiyanaka, tema ashaagantzinkari rini.

<sup>23</sup> Ikanta raminanake Jesús omerekiki, ikantziri riyotaanewo: “¡Osheki opomeentsita riyaatai ashaagantzinkari ipinkathariwentantzira Pawa!”

<sup>24</sup> Riyokitiitanake riyotaanewo ikemakerira ikantakeri. Irojatzi rapiitantanakawo ikantzi: “Notomyaayí ¡Osheki ompomeentsitzimotyaari awentaawori rashaagawo riyaatai tsika ipinkathariwentantzira Pawa! <sup>25</sup> Tema eero imata inkye piratsi camello imooki akoshi, iro owatsiperotachane ompomeentsitya inkye ashaagantzinkari tsika ipinkatharitzi Pawa.”

<sup>26</sup> Eekero riyokitiitanakitzi riyotaanewo, ikantashiretanake: “¿Tsikama iityaaka awisakoshiretaatsine?” <sup>27</sup> Raminanakeri Jesús, ikantziri: “Eero rimatziro apaniroini atziri, iri Pawa matakairine. Tema tekaatsi kompitzimotyaarine irirori.” <sup>28</sup> Ikantanake

Pedro: “Naakaga maawoini nokaataiyakeni, nookanakero okaatzi oshekitzimoyetanari, noy-aataiyakemini.” <sup>29</sup> Rakanake Jesús, ikantanakeri: “Imaperotatya, tzimatsirika kemisantanairori Kameethari Ñaantsi, kenkithatakotairone eejatzi, iro rookantanakawori inampi, irirentzi, iritsiro, ashitariri, iina, reentsite, rowane, <sup>30</sup> iri ñagairone impaire Pawa osheki. Osheki onkaate pankotsi, irirentzi, iritsiro, ashitariri, reentsite, rowane. Onkantawetakya osheki inkisaneentawaitaiteri, iñagairo paata añaagantsi kantaitaachane. <sup>31</sup> Tema tzimayetatsi etawori, iri ñagairone rimpoiyetai. Tzimayetatsi impoiyetatsiri, iri ñagairone retaiyaawo.”

*Rapiitairo ithawetakota Jesús rowamagaiteri  
(Mt. 20.17-19; Lc. 18.31-34)*

<sup>32</sup> Ikanta ritonkagaiyini ipampithatziro awotsi riyaatero Jerusalén-ki. Iri jewatatsi Jesús ranashitaiyani. Iyokitzii ikantayetaka riyotaanewo, thaawashire ikantaiyani royaatziri. Irojatzi rapiitantakawo Jesús ipiyotziri riyotaanewo ikaatzi 12, inkamanteri onkaate awishimoterine, ikantakeri: <sup>33</sup> “Aatatzi Jerusalén-ki. Ari ragaiteri Itomi Atziri raakaanteri reeware Imperatasorentsitaarewo intsipatakyaa Yotzinkariite, riyakowenteri ritsitokaiteri, ragaitanakeri atziriki kaari asheninkata, <sup>34</sup> ishirontawentaityaari, ripasawaitaiteri, reewawaitaiteri, ritsitokaiteri. Iro awisawetakya mawa kiteesheri, ari rañagai eejatzi.”

*Ikowawetari Jacobo eejatzi Juan  
(Mt. 20.20-28)*

<sup>35</sup> Ikanta Jacobo itsipatakari Juan, itomipaini Zebedeo, rontsitokapaakari okaakiini Jesú, ikantakeri: “Yotaantaneri, nokowi pantainawo namanemiri.” <sup>36</sup> Rosampitanakeri irirori:

“¿Oitaka pikowiri nantemiri?” <sup>37</sup> Ikantaiyini: “Tema irootaintsi pimpinkathariwentante, pishinetena nisaikanampitemi pakoperoki nontsipatemi ampinkathariwentante.”

<sup>38</sup> Ikantanakeri Jesú: “Te piyotziro oita pamananari. Osheki nonkemaatsityaari naaka. ¿Arima pinkisashitakyaawo eeroka pinkemaatsitya osheki? ¿Arima poshiyakena nonkame naaka?” \*

<sup>39</sup> Ikantaiyini irirori: “Aritake nimatakero.” Ikantzi Jesú: “Imapero, irootaintsi pimatero onkaate nonkemaatsityaari, † <sup>40</sup> irooma pisaikanampitena nakoperoki pintsipatena ampinkathariwentante, eero okanta naaka nishinetaimiro, rashì iita ikashaakaitzitakari ketziroini.” <sup>41</sup> Ikanta ikemaiyakeni itsipa riyotaanewo, ikisaitanakeri Jacobo eejatzi Juan.

<sup>42</sup> Ipiyotanairi eejatzi, ikantziri: “Piyotaiyini eeroka jimpe ikanta pinkathariyetatsiri jaka, rimperatanta. Ari roshiyari eejatzi iriiperotatsiri ipinkathataitziri irirori. <sup>43</sup> Irooma eerokapaini arika pinkowe piriiperote, poshiyakotyaari ronampiitari. <sup>44</sup> Iroorika pinkoweri peewatakaante,

---

\* **10:38** Jiroka jaka ikantajaantziri Jesú: “¿Arima pimatakero eeroka pirero kepishaari onkaate nireri naaka? ¿Arima poshiyakena naaka romitsitsiyaitena?” † **10:39** Jiroka jaka ikantajaantziri Jesú: “Ari poshiyakena eeroka pirero nireri naaka, ari take poshiyakena naaka romitsitsiyaitena. Imapero.”

poshiyakotaari noshikaarewo. <sup>45</sup> Te iro ripokantyaari Itomi Atziri rimperatantya, iro ripokantari roshiyaari onampirentsi inkamawentante, ripinakowentante.”

*Raminakagaitairi Bartimeo*

(Mt. 20.29-34; Lc. 18.35-43)

<sup>46</sup> Ikanta rareetaka Jesú斯 nampsiki Jericó. Irojatzi rowaagantanaawo itsipatanaari riyotaanewo ejatzi ikaatzi piyowentakariri. Ikanta awotsinampiki, iñaapaakeri atziri jitachari Bartimeo, itomi Timeo, ikowakotantzi impashitaityaari. <sup>47</sup> Kemake irirori, iri Jesú斯 poñaachari Nazaret, ikaimotawakeri, ikantziri: “¡Jesú斯, icharinetari David-ni, pineshironkataina!” <sup>48</sup> Ikisathawetanakari ikaataiyinira imairetantlyaarime, eekero ikaimanakitzi antawoite: “¡Icharinentari David-ni, pineshironkataina!” <sup>49</sup> Katziyapaaka Jesú斯, ikantzi: “Pinkaimenari.” Ari ikaimaitakeri ikantitziri: “Pinkatziye, ikaimatziumi, thaamenta pinkantanakya.” <sup>50</sup> Rookanakero iwewiryaaakowo, katziyanaka, rishiyashitanakari Jesú斯. <sup>51</sup> Rosampitawakeri, ikantziri: “¿Oitaka pikowakotanari? ¿Tsika nonkantemika?” Rakanake irirori, ikantzi: “Yotaantanerí, nokowi naminawaitai kameetha.” <sup>52</sup> Ikantanake Jesú斯: “Kameetha piyaatai, etsiyatakotakagaimi pawentagaanaga.” Apathakerotanaka raminanai kameetha, royaatanakeri Jesú斯.

## 11

*Areetaawo Jesú斯 Jerusalén-ki*

(Mt. 21.1-11; Lc. 19.28-40; Jn. 12.12-19)

<sup>1</sup> Irootaintsi rareetya Jesús Jerusalén-ki, riweyaaka otsipaki nampitsi jitachari Betfagé eejatzi Betania, otsipakerotawo otzishi Olivo. Rotyaantakeri apite riyotaanewo, <sup>2</sup> ikantakeri: “Piyaate nampitsiki atsipakerotakari. Ari piñaapaake ewonkeri piratsi burro inthatakotya, tekera ikyaakagaitariita. Pishiryaakoteri, pamakenari. <sup>3</sup> Arika inkantaitawakemi: ‘¿Piiterika pishiryaakotantariri burro?’ Pinkantanakeri eeroka: ‘Ikowatziiri Pinkathari. Aritake roipiyyaimiri paata.’” <sup>4</sup> Jataiyakeni, iñaapaakeri ithatakotaka ewonkeri burro pankotsikeroki. Rishiryaakotapaakeri. <sup>5</sup> Eenitatsi itsipa atziri ñawakeriri, ikaimotakeri: “¿Piiterika burro pishiryaakotantariri?” <sup>6</sup> Ikantanakeri irirori okaatzi ikantawakeriri Jesús ketziroini. Rishinetaakeniri. Raanakeri burro. <sup>7</sup> Ramakeniri Jesús. Rowaitakeniri manthakintsi imitzikaaki burro, ikyaakaanakari Jesús. <sup>8</sup> Eenitatsi omaankanaantsiri manthakintsi, itsipa chekanaintsi inchashi romaankashitanakeri owaneenkantanyaari tsika inkenanake. <sup>9</sup> Atziripaini jewatanaintsiri, ikaatzi oyaatakeriri itaapiiki, ikaimaiyini, ikantzi:

¡Kaakitake awinkatharitewé!

Tasonkawentaarewo rini, tema Pinkathari aitziri otyaantakeriri.

<sup>10</sup> Aakameethatairi poyaatyuarine acharine David-ní.

¡Kaakitake Awinkathariteperotyaari!

<sup>11</sup> Areetapaaka Jesús Jerusalén-ki, kyaapaake tasorentsipankoki, raminayetapaakero

maawoini. Tema tsireniityaanake, piyanaka Betania-ki itsipatanaari riyotaanewo ikaatzi 12.

*Riyakatziro Jesú斯 pankirentsi kaari kithokitatsiri*

(Mt. 21.18-19)

<sup>12</sup> Okanta okiteeshetamanai, piyaawo Jesú斯 ipoñagaawo Betania-ki, tasheyapaake niyanki awotsi. <sup>13</sup> Raminake jantó iñaatziiro pankirentsi, owaneenka okantaka oshi. Riyaatashitanakero raminero tzimatsirika okithoki. Tekaatsimaita, iyoshiita oshi, tema tekeraata okithokipaitetziita.  
\* <sup>14</sup> Riyakatanakero pankirentsi, ikantziro: “Pashi powairo eero pikithokitai.” Ikemaiiyakerini maawoini riyotaanewo.

*Roimishitowiri Jesú斯 yompariyetachari tasorentsipankoki*

(Mt. 21.12-17; Lc. 19.45-48; Jn. 2.13-22)

<sup>15</sup> Ikanta rareetaiyapaani Jerusalén-ki. Kyaapaake Jesú斯 tasorentsipankoki, rookapaakeri ikaatzi yompariyetachari. Rotatsinkapaakero rowaitzirira koriki, ari ikantakero tsika rowaitziri shiro. <sup>16</sup> Tekaatsi rishinetanai awisakairone rowaagawo tasorentsipankoki.

<sup>17</sup> Riyotaantanake, ikantzi: “Pairani rosankenaitakero, kantatsiri: ‘Nopanko ini jiroka, ari ramanapiintenari poñaayetachari maawoiniki nampitsi.’ Iro kantzimaitacha eerokapaini pamatawitatapiintake jakä pipimantayetzi, poshiyakaakero koshintzipango.” <sup>18</sup> Ikanta ike-maiyakeni Yotzinkaripaini, itsipatakari reeware

---

\* **11:13** Kantakotachari jakä “pankirentsi”, iro iitatziri eejatzi “higuera”.

Imperatasorentsitaarewo, raminaiyakeroni jimpe inkenakairo ritsitokakaanteri. Iro kantzimaitacha osheki ithaawantakari Jesús, tema tzimatsi osheki atziri iyokitziwentakeriri iñiirira kameetha okanta riyotaantziri. <sup>19</sup> Tema ari tsireniityaanai, piyanaawo Jesús.

*Kamashitanake pankirentsi riyakaitakeri  
(Mt. 21.19-22)*

<sup>20</sup> Ikanta ikenamanai isaikinta pankirentsi, iñaatziro kamashitanake, kamanake maawoini oparitha. <sup>21</sup> Ikenkithashiryaanairo Pedro riyakatakerowa chapinki Jesús. Ikantziri: “Yotaantaneri, paminero pankirentsi piyakatakeri, kamashitanake.” <sup>22</sup> Rakanake Jesús, ikantzi: “Pawentaiyaari eeroka Pawa. <sup>23</sup> Arika pinkowakoteri Pawa roshirinkerome otzishi rookero inkaareki, eerorika pikisoshirewaitzi, iri pawentaanakya, ari rimatakemiro. Imaperotatya. <sup>24</sup> Iro nokantantzimirori jiroka, tema arika pamañaari Pawa pinkowakoteri tsika oita, pawentaanakyaaririka, ari rimatakemiro pikowakotziriri. <sup>25</sup> Arika pamañaari Pawa, pimeyakotairo kaari inimotzimirি rantzimotaitzimirи eeroka, inantyaari Ashitairi Jenokisatzi impeyakotakagaimiro eeroka okaatzi pikenakaawaitashitakari. <sup>26</sup> Eerorika pipeyakotziro rantzimotaitzimirи eeroka kaari inimotzimi, ari inkantaimi eejatzi Ashitairi Jenokisatzi, eero ipeyakotzitaimi eeroka pantakero kaariperori.”

*Ishintsinka Jesús  
(Mt. 21.23-27; Lc. 20.1-8)*

**27** Ikanta rareetaiyapaani Jerusalén-ki, anashiwaitapaa Jesús tasorentsipankoki. Ripokashitapaakeri reeware Imperatasorentsi-taarewo, itsipatakari Yotzinkaripaini, ripokake eejatzi Itzinkampaini. **28** Rosampitapaakeri, ikantziri: “¿Jimpe itzimajaantzika pinkathari otyaantzimiri pantantawori jiroka?” **29** Ari rakanakeri Jesús, ikantanakeri: “Tzimatsi naaka nosampitemiri, arika pakakena ari nonkamantakemiro iitarika otyaantakenari. **30** Tema romitsitsiyaatantake Juan-ní, ¿Itaka otyaantakeriri? ¿Pawama? ¿Atzirima? Pakaiyeni.” **31** Ikantawakaanaka: “Arika ankantakeri Pawa otyaantziri, ari inkantanakai: ‘¿Oitaka kaari pikemisantantari?’” **32** Arika ankante: ‘Atziri otyaantakeri’, ari inkisanakai atziripaini. Tema ikantaiyini atziripaini, Kamantaperotantaneri rini Juan-ni.” **33** Ari rakaiyanakeni, ikantaiyini: “Te niyotero.” Ikantzitanaka eejatzi Jesús: “Ari nokantzitari naaka, eero nokamantzimi iita otyaantakenari.”

## 12

### *Kaariperoshireri antawairentzi (Mt. 21.33-46; Lc. 20.9-19)*

**1** Ari retanaawo Jesús roshiyakaawentziro okaatzi riyotaantayetziri, ikantzi: “Ipankitake atziri chochokimashi, rotantotakotakero, riwetsikake inchatona inkatzikaaterowa paata, riwetsikake iwamakare onkene risaikawentaitero pankirentsimashi. Raminake saikawenterone iwankiremashi, jatake irirori intaina. **2** Okanta irakapaitetake iwankire,

rotyaantawetaa rimperatanewo ragaateme okithoki. <sup>3</sup> Ikanta iñaawakeri antawairentzi, raawakeri ripasatawakeri, roipiyairi tekaatsi raanai. <sup>4</sup> Rotyaantawetaa eejatzi itsipa rimperatanewo. Romposayinawaitawakeri, ikaweyawaitawakeri, roipiyairi. <sup>5</sup> Rotyaantake eejatzi itsipa, ritsitokaitakeri. Osheki ikaatzi rotyaantawetakari, eenitatsi ripasawaitakeri, ritsitokayetakeri itsipapaini. <sup>6</sup> Apaani ikantapaaka itomi irirori, retakoperotane, rotyaantakeri, ikantashiretzi: ‘Jirikarika notomi naaka ari impinkathaitakeri.’ <sup>7</sup> Ikanta saikawentzirori pankirentsimashi, ikantawakaiyani: ‘Jirikaga ashitaiyaawone paata pankirentsimashi. Jame owamayeri, ayeroota aaka.’ <sup>8</sup> Raawakeri, ritsitokawakeri. Rookakeri othapiki pankirentsimashi. <sup>9</sup> ¿Itaka ranteri ashitawori pankirentsimashi? ¿Tema ari ripokanake irirori, ritsitokeri saikawentzirori iwankiremashi, raminai itsipa? <sup>10</sup> ¿Tema piñaanatero osankenarentsi? Kantatsiri: Imanintawetakawo mapi wetsikirori pankotsi. Iro kantzimaitacha ipiriintaitairo mapi, roshiyak-agaitairo iroorikame tzinkamitsi.

<sup>11</sup> Iri Awinkatharite Pawa piriintairori. Iro ayokitziiwentantariri.”

<sup>12</sup> Ari ikowawetayakani raakaantanakerime Jesús, riyotanake iri ikenkithatakotake. Te okanta, tema ithaawantakari atziripaini piyowentakariri. Ripakaanakeri, ripiyapithataari.

*Kameethatatsima ripinaiteri pinkathari  
(Mt. 22.15-22; Lc. 20.20-26)*

**13** Rotyaantaitake Fariseo itsipatakarí aapatziyariri Herodes, ikowaweta rikompitakayaarime Jesú. **14** Ikanta rareetaiyakani, ikantapaakeri: “Yotaantanerí, okaatzi piñaanetari eeroka irooperori inatzi, te oshiyawo ikowashiwitari atziri. Apa piyotaantziro kameethaperoini ikowakaantziri Pawa. ¿Kameethatatsima amperi koriki rapatotakaantziri Pinkathari César?” **15** Riyotakotakeri Jesú, ikowatzi rikompitakayaarime osampitakeriri, ikantanakeri: “¿Oitaka piñaantantanari? Pamakenari koriki, naminawakeriita.” **16** Ramaitapaakeniri. Ikantzi Jesú: “¿Iitaka ashitawori roshiyakaawo jaka? ¿Iitaka ashitawori iwairo?” Ikantaiyini irirori: “Rashi César.” **17** Ikantanake Jesú: “Tema iri César ashitawori, panteniri okaatzi ikowakaimiri pipinateri. Irooma okaatzi rashitari Pawa, panteniri okaatzi ikowakaimiri irirori.” Osheki riyokitziiwentaitanakeri Jesú.

*Rosampikowentaitziro arika rañagai kamayetatsiri*

*(Mt. 22.23-33; Lc. 20.27-40)*

**18** Ikanta ripokaiyakeni Sadoc-iite iñeeri Jesú. Iri Sadoc-iite kantayetatsiri eero rañagai kamayetatsiri. Rosampitapaakeri: **19** “Yotaantanerí, rosankenatake pairani Moisésni, kantatsiri:

Arika inkame atziri, rookanawentawo iina. Eerorka rowaiyakaawo, okameethatzí iinantaiyaawo irirentzi. Arika owaiyaiya tsinane, roshiyakaawo iriime ashityaarine oime kamaintsiri.

**20** Jame ankantawake: Tzimatsi ikaatzi 7 atziri, irirentzi rinaiyini. Etawori itzimi raawetaka iina, tekera osamaniteeta, kamake, te rowaiyakaanakawo iina. **21** Irojatzi raantaawo itsipa irirentzi oyaatapaakeriri itzimi. Eejatzi ikantzitaka irirori, kamake, te rowaiyakaawo. Ipoñaapaaka itsipa, eejatzi ikantzitaawo irirori. **22** Ari ikantaka maawoini irirentzi ikaatzira 7. Tekaatsi apaani owaiyakayaawone. Okantaawo paata tsinane kamai iroori. **23** Arika rañaayetaime paata ikamayewetaka, ¿tsika itzimika oimentaperotaiyaari tsinane? Tema maawoini iinantawetakawo ikaatzira 7.”

**24** Rakanakeri Jesú, ikantziri: “¿Itaka kaari pikemathatantawo osankenarentsi? ¿Itaka kaari piyotakotantawo ishintsinka Pawa? **25** Tema arika rañaayetai paata kamayetatsiri, eero itzimapai aawakainkari. Roshiyapaiyaari maninkariite saikayetatsiri inkiteki. **26** Irooma ikantakota rañaayetai kamayetatsiri, ¿tema piñaanatero rosankenare Moisés-ni tsika ikanta Pawa riñaanatantakariri itagaganki kitocheemaishi? Ikantakeri:

Moisés, Naaka Pawa, ipinkathatziri Abraham, Isaac, eejatzi Jacob.

**27** Ari ayotziri, añaayetatsi irirori, tema te rimatziro kaminkari impinkathateri Pawa, apatziro añaayetatsiri. ¿Piñaakero? Pikenakaashitakawo eero ka.”

*Ikenkithatakoitziro ikowakaaperotairi Pawa  
(Mt. 22.34-40)*

**28** Ari ripokapaake Yotzinkari, ikemapaakeri riñaanatawakaa. Yotapaake kameetha Jesú

riyotaakeri Sadoc-iite, rosampitapaakeri irirori: “¿Otzimika kowaperotachari Inintakaantaitanewo?”<sup>29</sup> Rakanake Jesús, ikantzi: “Jiroka kowaperotachari, okantzi:

¡Israel-iite! Jirika Awinkatharite Pawa, apaniro ikanta Ipinkatharitzi irirori.

<sup>30</sup> Pinintaperotairi, pinintashirenkatairi, pinintashiretairi, pinintashintsitairi eejatzi.

Iroowa kowaperotachari Inintakaantaitanewo.

<sup>31</sup> Ari oshiyawo oyaatapaakerori, okantzi:

Petakotaiyaari pisheninka, poshiyakagairi pinethairo piwatha eeroka.

Tekaatsira otsipa Inintakaantaitanewo anayirori jirokapaini.”<sup>32</sup> Ikantanake Yotzinkari:

“Kameethatake Yotaantaneri, imaperotatyá pikantakeri: Apaani ikanta Pawa tekaatsi itsipa.”<sup>33</sup> Osheki okameethatake anintaperotairi, anintashirenkatairi, anintashiretairi, anintashintsitairi. Ari ankantawakagaiyaari eejatzi aaka, etakotawakagaiya. Iro ikowakaaperotairi Pawa, anairo ritagaitziniriri, maawoini rashitakagaitariri jaka.”<sup>34</sup> Ikanta Jesús, iñaakeri kameetha okanta ikantakeri, ikantanakeri:

“Iroowetaincha pimpinkathaterime Pawa, inantyaari impinkathariwentaimi irirori.” Tekaatsira kowanaatsine rosampitanairi Jesús.

### *¿Itaka charinetariri Cristo?*

(Mt. 22.41-46; Lc. 20.41-44)

<sup>35</sup> Riyotaantanake Jesús tasorentsipankoki, ikantzi: “¿Oitaka pikenkithashiryaaari eeroka, arika pinkemeri Yotzinkaripaini, ikantzi irirori: ‘Jirika Cristo-tatsiri icharine rinatzi David-ni?’”

**36** Tema Tasorenkantsi ñaawaitakaakeriri pairani David-ni, ikantake:

Riñaawaitake Pinkathari, ikantawairi Nowinkatharite:

Pisaikapai nakoperoki, ampinkathariwentante, Irojatzi paata nowasanketantaiyaariri kisaneentakemiri, ari pimakoryaayitzitantaiyaari.

**37** Ikantzitaka David-ni irirori: ‘Nowinkatharite rinatzi Cristo.’ ¿Tsika inkene incharinetyaari?’’ Inimoyetakeri maawoini atziri piyotainchari, ikemirira okaatzi ikantayetziri Jesús.

*Ikenkithatakoitziri Yotzinkaripaini  
(Mt. 23.1-36; Lc. 11.37-54; 20.45-47)*

**38** Ari ikantanake eejatzi Jesús: “Paamaiyaari Yotzinkaripaini. Osheki iñaamatawo rowaneenkatya kameetha, ishametakayero iithaarekoryampyaa. Ikowi impinkathatapiintaiteri riwethaityaari arika iñagaiteri. **39** Arika riyaate pankotsiki ipiyotaitapiinta, ikowapiintzirosatekakya niyankineki. Ari ikantari arika rowaiyani isheninka, ikowapiintzi rosatekya. **40** Rawentaakawo eejatzi kamayetatsiri oime rashitzitawo opanko. Iro rosamaninkantawori ramanayetapiinta eero ryotantaitari. Iro kantzimaitacha antawowa rowasanketaiteri.”

*Ashironkainkawo tsinane  
(Lc. 21.1-4)*

**41** Ikanta Jesús risaikimotapaakero rowaitapiintzirira koriki, raminaminthatziri oteyetziriri iyorikite. Ripokaiyapaakeni ashaagantzinkari roteperotzi irirori iyorikite.

**42** Pokapaake tsinane kamatsiri oime, ashironkainkawo inatzi, otetapaake iroori

apipentyakiteeni koriki, tekaatsi yomaatyaaarne ramanantantaityaari. <sup>43</sup> Ikantanakeri Jesús riyotaanewo: “Anaantake jiroka tsinane, anaakeri ikaatzi oteyewetachari osheki. Imaperotatyaga. <sup>44</sup> Tema ikaatzi otewetachari osheki, rotetashitakari tzimagaantatsiri iyorikite. Irooma jiroka ashironkainkawo, apintziryaakeri oorikite amanantantaarime okowayetziri.”

## 13

*Ikenkithatakotziro Jesús ontzimpookya tasorentsipanko*

(Mt. 24.1-2; Lc. 21.5-6)

<sup>1</sup> Ikanta rishitowanai Jesús tasorentsipankoki, ikantziri riyotaanewo: “Yotaantaneri, paminero mapi riwetsikantaitawori, antawo inayetzi, owaneenkawaitaka pankotsi.” <sup>2</sup> Ikantzi Jesús: “Maawoini pankotsi okaatzi piñaakerika, irootaintsi intzimpookaitero, eero iñagaitairo pewiryaayetachari mapi.”

*Iñagaitairi paata*

(Mt. 24.3-28; Lc. 21.7-24; 17.22-24)

<sup>3</sup> Ikanta ritonkaanake otzishiki Olivo, otsipakerotari tasorentsipanko. Ari risaikapaake Jesús. Ikanta Pedro, Juan, Jacobo ejatatzi Andrés, rosampitakeri jantyaatsikaini, ikantziri:

<sup>4</sup> “Pinkamantena: ¿Tsikapaiteka imonkaatyá pikantakeri? Arika imonkaatzimatakyá, ¿tsíka onkantyaaka niyotantyaari?” <sup>5</sup> Ari rakanake Jesús ikantziri: “Paamaya ramatawititzimikari.

<sup>6</sup> Tema osheki kowatsine ramatawitemi paata, raakotapaakena nowairo, inkante: ‘Cristo

ninatzi naaka.’ <sup>7</sup> Ari pinkemakoyetakero omanarentsi, paamaya ominthaawashiretzimikari, tema ontzimatye imonkaayetaiya jirokapaini, ithonkimatantaiyaari maawoini paata. <sup>8</sup> Romanatawakaiya rotyaantane pinkatharipaini otsipaki nampitsiki. Iñagaitairo eejatzi osheki omoyekayetya, iñagaitairo ritasheneentaite. Iroowa retaityaari iñagaitero inkemaatsitaityaawo jirokapaini.

<sup>9</sup> Paamaya. Tema atake raakaantaitakemi jewaripainiki ripasawaitaitemi pankotsiki rapatotapiintaitaga. Ari ragaitakemi risaikira pinkatharentsiperori okantakaantziro pawentaanaga, arira pinkenkithatakotenari janta. <sup>10</sup> Iroowa kowaperotachari inkemakotairo atziripaini Kameethari Ñaantsi maawoiniki nampitsi. <sup>11</sup> Arika ragitanakemi, eero pikantashiretti: ‘¿Oitaka nonkanteriri?’ Tema Tasorenkantsi yotakaimirone oitarika pinkanteri, tera eeroka ñaawaitashitachane. <sup>12</sup> Ari iñagaitake aakaanterine irirentzi rowamaakaanteri. Piñeeri aakaanterine itomi. Piñeeri owamaakaanterine ipaapate inkisaneentanakeri. <sup>13</sup> Osheki piñeero inkisaneentaitemi okantakaantziro paakotaanaga nowairo pikemisantaana naaka, iro kantzimaitacha arika pinkamaitanakyaawo pawentina, ari nowawisaakotaimi.

<sup>14</sup> Arika piñaakeri iitaitziri ‘Pinkaari Thonkaatantaneri’ risaikapaake tsika te ishinetaantsita, inkaatera nampitaiyaawone Judea-ki, ontzimatye rishiye tonkaariki. Iroowa ikenkithatakotakeri pairani Kamantantaneri Daniel-ni.” (Maawoini ñaanayetairone jiroka,

ontzimatye inkemathatairo.) **15** “Pisaikirika jakakeroki pipanko, ari pimpoñaanakya pishiyanake, eero pikyaapanaantzi paapainte tsikarika oita. **16** Powanekirika pisaiki, eero paapanaantziro piithaare. **17** Iñkantamatsitaitero paata motziyetatsiri, tzimayetatsiri eentsite thotatsiri iteni! **18** Pamañaari Pawa, arika pishiyayetanake, onkantya eero itonkyotantzimi kyaawontsi. **19** Tema antawoite rashironkagaitya paata. Pairani owakera riwetsikaitakero kipatsi, irojatzi iroñaaka, te iñagaitziro oshiyaawone jiroka ashironkagaantsi. Eerowa apiitaawo iñagaitairo oshiyaawone. **20** Eerome ishintsitakeme Awinkatharite romairyaaantakawori ashironkagaantsi, tekaatsira awisakotaatsineme. Ikamintha intzimayetai riyoyaayetairi Pawa, awentagaiyaarine, iroowa romairyaaantaiyaawori ashironkagaantsi. **21** Arika pinkeme inkantaitemi: ‘Jirika Cristo’, itsipa kantemine: ‘Jirinta Cristo’, eero pikemisantziri. **22** Tema ripokayete oshiyakotyaarine Cristo, oshiyakotyaarine Kamantantaneri. Ari ritasonkawentantake, inkowe ramatawiteri riyoyaayetairi Pawa. **23** Paamaya eeroka, tema nokamantzitakemiro iroñaaka.”

*Ripiyantaiyaari Itomi Atziri  
(Mt. 24.29-35, 42-44; Lc. 21.25-36)*

**24** “Paata, arika onkaatapaake rashironkagaita antawo, eero ritamorekaawo ooryaa, eero ritamorekitaawo kashiri, **25** rithopiryaaayete impokiro, maawoini oorentayetachari jenoki ripookayetairo. **26** Aripaite ripokai Itomi Atziri

inkenantapaiyaawo menkori, iñagaitawairo ishintsinka eejatzi rowaneenkawo. <sup>27</sup> Rotyaanteri maninkaripaini, impiyotairi riyoyaitakeri nampiyetawori kipatsiki, maawoini.

<sup>28</sup> Ari oshiyawo piñaapiintziowa eereshiyetzi pankirentsi, piyotaantziro irootaintsi osarentsitzimatai. \* <sup>29</sup> Iro piyoteri eerokapaini, arika piñaayetero nokamantakemiri, pokimataanaga. <sup>30</sup> Eero ipeyayetzita jirika asheninkapaini, irojatzi iñaantakyaawori nokamantakemiri. Imaperotaty. <sup>31</sup> Eero piñaaneentairo inkite eejatzi kipatsi, irooma niñaaneyetakari imaperotaatyeyya iroori.

<sup>32</sup> Apatziro riyotziro Ashitairi imonkaatan-taiyaari. Tera riyotziro Itomi eejatzi maninkaripaini saikatsiri inkiteki. <sup>33</sup> Paamaya, aamaawenta pinkantya, pamaña. Tera piyote tsikapaite imonkaatantaiyaari. <sup>34</sup> Oshiyawo arika riyaate atziri intaina. Rookanakero ipanko, ikantayetanakeri inoshikanewo oitarika ranteniriri. Eejatzi inkantakeri kempoyiirori pankotsi, ikantanakeri: ‘Paamaya.’ <sup>35</sup> Paamaya eeroka, tera piyote tsikapaite ripiyai ashitawori ipanko, tsireniiteeni, niyankiiteki, riñaakerika tyaapa, onkiteeshetamanairika, <sup>36</sup> tema arika romapokairo ripiyai, onkantya eero iñaantapaimi pimaye. <sup>37</sup> Okaatzi nokantayetakemiri eeroka, irojatzira nokantzitariri maawoini: Paamaya.”

## 14

---

\* **13:28** Kantakotachari jika “pankirentsi”, irojatzi ikantaitziri “higuera”, iroowa shookatsiri otsipaki nampitsi.

*Ikamantawakaита raakaантери Jesúс  
(Mt. 26.1-5; Lc. 22.1-2; Jn. 11.45-53)*

<sup>1</sup> Yotapaaka apite kiteesheri roimoshirenkan-taitawori Anonkoryagaantsi, rowantaitawori eejatzi tashirentsiponkaki. Ari ikamantawakaari reeware Imperatasorentsitaarewo itsipatakari Yotzinkaripaini, ikantawakagaiyani: “Jame amatawiteri Jesúс ayeri, owamaakaантери.  
<sup>2</sup> Iro kantacha eero akoshekari kiteesheriki roimoshirenkaitaga, ikisakowentzirikari atziripaini.”

*Risaitantaitari Jesúс kasankari  
(Mt. 26.6-13; Jn. 12.1-8)*

<sup>3</sup> Ikanta ikenanai Jesúс Betania-ki, ipankoki Simón pathaawaiwetachari. Ari risaikake rowaiyani. Areetapaaka tsinane amakotake kasankari. Iyoshiita owaa inchateyaki jitachari “nardo”, osheki owinawo, kameetha okantaka onaki riwetsikaitziro mapi oita “alabastro”. Isataakotakero othowaki, isaitantakari ipatziitoki Jesúс. <sup>4</sup> Kisanaka ikaatzi ñaakerori, ikantawakaанака: “¿Oitaka apaatantawori kasankari? <sup>5</sup> Arikame ompimantyaame, ragaiteme osheki koriki inkaate 300 denario, iri ampashityaarime ashironkainkari.” Ikisanakero tsinane. <sup>6</sup> Ari ikantanake Jesúс: “Piñaaminthatashityaawo, ¿Oitaka pikisantawori? Kameetha okanta noñaakero antakeri. <sup>7</sup> Pitsipatapiintari ashironkainkari, pinkowerika petakotaari, ari pimpashitakaari. Irooma naaka, eero piñaapiintana pintsipatena. <sup>8</sup> Jiroka tsinane antatziiro aawiiri iroori, jewatake isaitantanawo kasankari oshiyakaawentatyana

arika inkaitakena. <sup>9</sup> Arika inkenkithatakoitero paata Kameethari Ñaantsi, inkemakotaitero tsinane, iroowa roshiretantaityaawori antakeri iroori. Imaperotatyaaga.”

*Ikenkithashirya Judas raakaanteri Jesús  
(Mt. 26.14-16; Lc. 22.3-6)*

<sup>10</sup> Ikanta Judas Iscariote, riyaatashitakeri reeware Imperatasorentsitaarewo impimanteri Jesús. Iriiwetakaga riyotaanewo kaawetachari 12. <sup>11</sup> Antawo ikimoshiretaiyanakeni jewari, ikashaakaakari imperi koriki paata. Raminake Judas tsikapaite raakaanteri Jesús.

*Riweyaantawo rowakaanaari riyotaanewo  
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Areetapaaka etawori kiteesheri rowantaitawori tashirentsiponkaki, rowamaitzi eejatzi rowaitari kiteesheriki Anonkoryagaantsiki. Rosampitakeri riyotaanewo Jesús, ikantziri: “Yotaantanerí, ¿Tsika onkotsitakaanteka aaka?”

<sup>13</sup> Ari ikantanakeri apite riyotaanewo: “Piyaate nampitsiki. Ari pitonkyotaari atziri raakotziro iñaate chomoki. Poyaatanakeri, <sup>14</sup> tsikarika inkyapai, pinkanteri ashitarawori ipanko: ‘Ikowatzi riyote yotaanari tsikarika rowakayaari riyotaanewo.’ <sup>15</sup> Ari roñaaganakemiro jenoki ipanko, antawo okantaka riwetsikaitakero maawoini onkene rowaitya. Ari ponkotsitakaanteri oyaari.” <sup>16</sup> Jatake riyotaanewo areetaka nampitsiki. Iñaakero okaatzi ikantakeriri, ari ronkotsitakaantakeri royaari.

<sup>17</sup> Okanta otsireniityaanake areetapaaka Jesús, itsipatapaakari riyotaanewo ikaatzi 12. <sup>18</sup> Ikanta rowaiyani, ikantzi Jesús: “Pikaatakera pakiyootana, eenitatsi apaani pithokashitenane. Imaperotatyा.” <sup>19</sup> Owashire ikantaiyanakan. Rosampiyetanakeri, ikantziri: “¿Naakama pithokashitemine?” Itsipa rosampitziri: “¿Naakama?” <sup>20</sup> Ikantzi Jesús: “Jirira pikaatakera pakiyootakena. <sup>21</sup> Imaperotatyaga impeya Itomi Atziri, rosankenatakoitakeri pairani. Ikantaitake: ‘¡Ikantamatsitziri aakaanterine! Eerome itzimime irirori.’”

<sup>22</sup> Eeniro rowaiyani, raakero Jesús pan. Riwetharyaawentakawo, itzipetowakero, ipayetakeri riyotaanewo, ikantziri: “Poyaawo, nowatha inatzi.” <sup>23</sup> Raakotanakero riraitziri, riwetharyaawentakawo, ipakotakeri riyotaanewo, rirayetakero maawoini. <sup>24</sup> Ikantziri: “Niraa inatzi, iro shitowaatsine rawisakotantaiyaari osheki. Iroowa oñaagantaperoterone aapatziyawakaantaiyaari. <sup>25</sup> Eero niritaawo, irojatzi paata tsika impinkathariwentantai Pawa, ari napiitairo. Imaperotatyা.”

*Ikenkithatakotziro Jesús rookanawentante Pedro*

(Mt. 26.30-35; Lc. 22.31-34; Jn. 13.36-38)

<sup>26</sup> Ikanta romampaakotanakari Pawa, jatanai tonkaariki otzishiki Olivo. <sup>27</sup> Ikantzi Jesús: “Irootaintsi pookanawentaiyenani tsirenirikika. Tema rosankenaitake pairani kantatsiri: Rowamaiteri kempoyairiri oweja, rithonkya ripookayetanake ipira.

<sup>28</sup> Iro kantacha, arika nañagai, Galilea-ki añaawakagaiya.” <sup>29</sup> Ikantanake Pedro: “Aritaikema rookanawentakemi itsipapaini, eero nimatziro naaka.” <sup>30</sup> Ikantzi Jesú: “Iroñaaka tsirenirika, tekera rapiiteroota riñe tyapa, mawa poipiyero, pinkante: ‘Te niyotziri Jesú.’ Imaperotatyá.” <sup>31</sup> Eekero ishintsitazi Pedro, ikantzi: “Eero nookanawentzimi, kemetaka ari ankaate ankame.” Ari ikantaiyakeni eejatzi maawoini.

*Ramana Jesú Getsemani-ki  
(Mt. 26.36-46; Lc. 22.39-46)*

<sup>32</sup> Ikanta rareetaiyakaní Getsemani-ki, ikantapaakeri riyotaanewo: “Ari pisaikawake jaka, namanamanaatawakyaata.” <sup>33</sup> Itsipatanakari Pedro, Jacobo eejatzi Juan. Antawo riraakoshiretapaaka. <sup>34</sup> Ikantziri: “Owamaimatatyáana nowashirenka. Ari pisaikawake eeroka, pinkakempite.” <sup>35</sup> Rowaaganeentanaka irirori. Otziwerowapaaka kipatsiki, ramanapaaka, onkantyaama eero ikemaatsitantawo awishimoterine. <sup>36</sup> Ikantzi: “Ashitanarí, tekaatsi kompitzimotemine eeroka. Nokowaweta pontsiparyaaakowentename onkaate nonkemaatsityaari. Iro kantacha eero pimatanawo okaatzi nokowawetakari, iroowa pimate pikowakaanari eeroka.” <sup>37</sup> Piyapaawo, iñaapaatziri rimagaiyini. Ikantapaakeri Pedro: “Simón, ¿litaka pimaantari? ¿Tema pikisashitawo piwochokinka?” <sup>38</sup> Pinkakempite, pamaña, otzimikari piyenakaashitanewo. Te pikisas-hiwaineta, osheki pikowawetari panterime.” <sup>39</sup> Eejatzi ripiyanaa, amanapaa. Irojatzi rapiitapai

ikantakeri inkaaganki. **40** Ikanta ripiyapaa, eejatzi iñaapairi rimagaiyini, tema antawo okantaka iwochokinka. Ikaaniwaitzi riyotaanewo, te riyotzi tsika inkante. **41** Okanta mawatapaintsiri ripiyaka, ikantapaakeri: “¿Irojatzima pimagaiyini? Monkaatapaakaga ragaitantyaariri Itomi Atziri, ragaiteri janta kaariperoshireriki atziri. **42** Pimpriinte, thame aatai. Jekaatapaakera pithokashitenane.”

*Ragaitanakeri Jesús*

(Mt. 26.47-56; Lc. 22.47-53; Jn. 18.2-11)

**43** Ikenkithawaiminthatzi Jesús, areetapaaka Judas itsipawetapiintari. Osheki itsipatapaakari, ramayetake rosataamento, ripasamento. Rotyaantanewo pinkatharipaini piyowentakariri Jesús: Reeware Imperatasorentsitaarewo, Yotzinkaripaini, eejatzi Itzinkampaini. **44** Tema Judas pithokashitantachari, ikantzitakari ketziroini ramanewo: “Tsikarika intzime nonthowootapaakeri, iriitakera, poosoteri, paanakeri.” **45** Ikanta rareetapaaka, rontsitokapaakari okaakiini Jesús, ikantapaakeri: “Yotaantanerí.” Ithowootapaakeri riwethatapaakari. **46** Rotaiyaitapaakeri Jesús, roosotaitapaakeri. **47** Ikanta tsipatakariiri okaakiini Jesús, inowikyaanakero rosataamento, rithatzinkitakeri ikempita inoshikane reeware Imperatasorentsitaarewo. **48** Ikantanake Jesús: “¿Naakama koshintzi, pamashitantanari posataamento, pipasamento?” **49** Nashi nowapiintziro piñaapiintana niyotaantzi tasorentsipankoki ¿Kaarima paantana janta?

Arira imonkaatakari rosankenatakoitakenari pairani.”<sup>50</sup> Shiyaiyanakanı riyotaanewo, rookanawentanakeri apaniroini.

*Mainari shiyainchari*

<sup>51</sup> Tzimatsi itsipa mainari oyaatakowentanakeriri Jesús. Ikithaa wetaka. Iro kantzimaitacha rotaiyawee takari irirori,<sup>52</sup> rookanakero iithaare rithañaanakaga, raamerekita shitanaka.

*Ipiyowentaitari Jesús*

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup> Ikanta ragaitanakeri Jesús reewaperoreki Imperatasorentsitaarewo. Ari ipiyotaiyakani maawoini reeware Imperatasorentsitaarewo, itsipatakari Itzinkampaini, eejatzi Yotzinkari-paini.<sup>54</sup> Ikanta Pedro noshikaka irirori ripoki neetsikeroini, royaatakowentakeri Jesús, irojatzi rareetantapaaka isaikira ipanko reewaperore Imperatasorentsitaarewo. Ari ikatziyapaaka itsipatapaakari rimperatanepaini, rakitsitaiyani paampariki.

<sup>55</sup> Ikanta

reeware paini Imperatasorentsitaarewo itsipatakari piyotainchari, raminawetaka iita thaiyakotyaarine Jesús onkene rowamaakaanteri.

<sup>56</sup> Osheki thaiyakowetapaakari,

te oshiyawakaa ikantayewetakari itsipapaini.

<sup>57</sup> Katziyanaka apaanipaini, ithaiyakotanakari Jesús, ikantzi:<sup>58</sup> “Nokemiri chapinki jirika, ikantzi: ‘Ari nontzimpookakero tasorentsipanko riwetsikanewo atziri, iro awisawetakya mawa kiteesheri niwetsikai otsipa, kaari ratsipeta

atziri riwetsikairo.’ ” <sup>59</sup> Inashiyetaka okaatzi ikantayetakeri itsipa. <sup>60</sup> Katziyanaka reewaperote Imperatasorentsitaarewo, rosampitanakeri Jesús, ikantziri: “¿Oitaka kaari pakanta? ¿Tema pikemi okaatzi ikantakoitzimiri?” <sup>61</sup> Irojatzi imairetake, te raki. Rapiitakeri rosampitziri, ikantziri: “¿Eeroka Cristo, Itomi Tasorentsi?” <sup>62</sup> Rakanake Jesús, ikantzi: “Naakatake. Irootaintsi piñeeri Itomi Atziri risaikai rakoperoki Pawa impinkatharitai. Piñeeri eejatzi ripiyai inkenapai menkoriki.” <sup>63</sup> Ikanta ikemake jewaperori, itzisagaanakero iithaare ikisanaka, ikantzi: “¿Eenitatsima otsipa ankoweri inthawetakoiteri? <sup>64</sup> Pikemake maawoini rithainkakeri Pawa. ¿Tsika pikantaiyinika eeroka?” Ikantzi maawoini: “¡Tzimataike iyenakaashitanewo! ¡Ontzimatye inkame!” <sup>65</sup> Eenitatsi jewawootanakeriri. Tzimatsi itsipa otzimikawootakeriri, ikaposawaitziri, ikantzimaitari: “¿Piyote Kamantantanerí?” Rimatzitakawo rimperatanewo jewaperori, ripasawoowaitakeri.

*Ikantzi Pedro: Te niyotziri Jesús*

(Mt. 26.69-75; Lc. 22.55-62; Jn. 18.15-18, 25-27)

<sup>66</sup> Risaikake Pedro irirori jakakeroki, shitowapaake tsinane rimperanawo reewaperore Imperatasorentsitaarewo. <sup>67</sup> Oñaapaakeri Pedro rakitsita paampariki, okantziri: “¿Tema eeroka itsipataganki Jesús Nazaret-satzí?” <sup>68</sup> Roipiyayanakero Pedro, ikantanake: “Te, tera niyotziri iita pikantanari.” Shitowanake eepichokiini. Ñaanake tyaapa. <sup>69</sup> Okanta

osamaniityaake, oñaapairi ejatzi, okamtakeri ikaatzi akitsitachari, okantziri: “Irijatzira jirika.” <sup>70</sup> Rapiitanakero Pedro roipiyiro. Tekera osamaniteeta, rapiitanakero ikaatzi saikantsiri rosampitziri, ikantziri: “Eerokaga itsipata Jesús, tema Galilea-satzi pinatzi, ariwaitakemi riñaawaitzi.” <sup>71</sup> Ikantzi: “Te niyoteri pikantanari. Riyotzi Pawa imapero nokantzi, nothaiyarika, rowasanketainaata.” <sup>72</sup> Ari rapiitanakero riñaanake tyaapa, apitera rapiitakero. Ikenkithashiryaana Pedro ikantakeriri Jesús: “Arika apitetanake riñe tyaapa, mawa poipiyero, pinkante: ‘Te niyotziri Jesús.’” Iraanaka ikenkithashiryaanakerowa.

## 15

### *Ragaitanakeri Jesús Pilato-ki (Mt. 27.1-2, 11-14; Lc. 23.1-5; Jn. 18.28-38)*

<sup>1</sup> Okanta okiteeshetamanai, ipiyotaiyamanaani maawoini pinkatharentsi: reeware Imperatasorentsitaarewo itsipatakari Itzinkampaini, ejatzi Yotzinkaripaini, osheki ikantzimataitakeri Jesús. Roosoitanakeri, ragaitanakeri risaikinta Pilato. <sup>2</sup> Rosampitawakeri Pilato, ikantziri: “¿Eerokama iwinkatharite Judá-ite?” Rakanake Jesús, ikantzi: “Irootake pikantakeri.” <sup>3</sup> Ikanta reeware Imperatasorentsitaarewo, iñaakatsimatanakari, ithaiyakotanakari. <sup>4</sup> Rapiitanakeri Pilato rosampitziri: “¿Tekaatsima pinkanteri eeroka? ¿Tema pikemi okaatzi ikantakoitzimiri?” <sup>5</sup> Te raki Jesús. Riyokitzi-wentanakeri Pilato jirika Jesús.

*Riyakowentaitziri Jesús  
(Mt. 27.15-31; Lc. 23.13-25; Jn. 18.38-19.16)*

<sup>6</sup> Eenitatsi rantapiintziri Pilato: Maawoini osarentsiki arika roimoshirenkyá Judá-ite, romishitowakaantzi isheninka raakaantaitziri, tsikarika itzimi inkoweri atziripaini. <sup>7</sup> Tzimatsi jitachari Barrabás, raakaantaitziri itsipayetakari ikaataiyinira ritsitokantzi, rantaminthatziri iwinkatharite. <sup>8</sup> Ikanta ripokaiyapaakeni atziri, ikowakotapaakeri Pilato rantero rametapiintari. <sup>9</sup> Rakanake Pilato, ikantzi: “¿Iriima pikowi nomishitowakaanteri iitaitziri ‘Twinkatharite Judá-ite?’” <sup>10</sup> Riyotake irirori Pilato, ikisawaitashita reeware Imperatasorentsitaarewo raakaantantakariri Jesús. <sup>11</sup> Iri kantzimaitacha reeware Imperatasorentsitaarewo, rakakaakeri atziripaini inkante: “Iri kameethatatsi romishitowaiteri Barrabás.” <sup>12</sup> Rapiitanakeri Pilato rosampitziri: “Jirika iitaitziri ‘Twinkatharite Judá-ite’, ¿Tsikama nonkanterika?” <sup>13</sup> Ikantzi ikaimaiyini atziri: “¡Pinkentakotakaanteri!” <sup>14</sup> Ikantzi Pilato: “¿Eenit-sima kaariperori rantakeri?” Eekero ishintsitatzi ikaimaiyini ikantzi: “¡Pinkentakotakaanteri!” <sup>15</sup> Ikowanake Pilato ranteniri ikowakeri atziripaini, romishitowakaantakeri Barrabás. Ripasatakaantanakeri Jesús, ragaitanakeri inkentakoiteri.

<sup>16</sup> Ikanta owayeripaini ikyakaanakeri Jesús ipankoki Pilato, iitaitziro “Pretorio”. Ari ipiyotari maawoini owayeri. <sup>17</sup> Ikithaatapaakeri kithaarentsi anashirikimawotsiri oshiyawori ikithaatapiintari pinkathariyetatsiri. Irojatzi

ramanthaitantanakariri kitocheetapo. <sup>18</sup> Iroowa rantantawori jiroka, tema rithainkimawaitatziiri. Ikaimakowitziri, ikantzi: “Jirikatá iwinkatharite Judá-ite!” <sup>19</sup> Romposayinatantanakari sawoopanke. Reewawootanakeri. Rotzi-werowashitzimaitari impinkathaterime. <sup>20</sup> Reshitakeri ishirontaminthatari. Raatonkor-yagairi ikithaatakeriri inkaaganki, ikithaatairi iithaare. Raanakeri inkentakoteri.

*Ikentakoitziri Cristo irojatzi ikamantakari  
(Mt. 27.32-56; Lc. 23.26-49; Jn. 19.17-30)*

<sup>21</sup> Ikanta Simón, poñaachari Cirene, ipaapate Alejandro eejatzi Rufo, ritonkyotakari rareeta irirori nampitsiki, ishintsineentaitanakeri inatanakero inkentakotaitantyaariri Jesús. <sup>22</sup> Ragaitanakeri tonkaariki oita “Gólgota”, (akantziri apaanteki aaka: “Atziriitoní”). <sup>23</sup> Ipakoitapaakeri imere rowaitaitakero kepishaari, te ririmaitawo. \* <sup>24</sup> Ikentakoitakeri. Ikanta owayeripaini rookaitawakaakawo iithaare Jesús, roshiyakaakero iñaaryaataita riyatantyaari iitarika ayerone. <sup>25</sup> Jenokiityaapaake ooryaatsiri, ikentakoitakeri Jesús. † <sup>26</sup> Rosankenaitake opoñaantari ikentakoitantariri, okantzi: IWINKATHARITE JUDÁ-ITE. <sup>27</sup> Ari itsipatagaitakeri ikentakoitziri apite koshintzi,

---

\* <sup>15:23</sup> Jiroka “kepishaari” oita mirra. Iroowa roitaitziriri atziri, riyampawhatantyaari, eero ikemaatsiwaitantawo arika rowasanketaiteri. † <sup>15:25</sup> Kantakotachari jika “jenokiityaapaake ooryaatsiri” irojatzi ikantaitzitari pairani ooryaa 3.

ikatziyakotaka apaani rakoperoki, itsipa ram-pateki. <sup>28</sup> Ari imonkaatakari osankenatainchari pairani, okantzi:

Itsipatagaitakeri kaariperoshiretatsiri.

<sup>29</sup> Rithainkawaitakeri ikaatzi awisayetatsiri janta, rotekayinata, ikantziri: “Tema eeroka tzimpookirori tasorentsipango, iro awisake mawa kiteesheri piwetsikairo eejatzi. †

<sup>30</sup> ¿Iitaka kaari payiitanta ikentakoitakemira powawisaakotaiya?” <sup>31</sup> Ari ikantakeri eejatzi reeware Imperatasorentsitaarewo itsipatakari Yotzinkaripaini, rowashiyawentari, ikantawakaiyani: “Rowawisaakotzi itsipa, ¿Kaarima rimatantawo rowawisaakotya irirori? <sup>32</sup> ¡Janjaatya, raiite Cristo-wetachari iitatziri ‘Iwinkatharite Israel-iite’, ankemisan-tantyaariri!” Rimatzitakari eejatzi ikaataiyinira ikentakota, rithainkitakari.

<sup>33</sup> Ikanta itampatzikatapaake ooryaatsiri, omapokashitapaaka otsirenikitanake, irojatzi ishaawiiteeni ooryaa. § <sup>34</sup> Ari ikaimanake Jesús shintsiini, ikantanake: “¡Elo! ¡Elo! ¿Lama sabactani?” (Iro ikantaitziri apaanteki aaka: “Pawa, Pawa, ¿iitaka pookanawentan-takenari?”) <sup>35</sup> Ikanta saikawentakeriri Jesús, ikemawetawakari ikaimanake. Ikantanake: “Pinkemerri, ikaimatziiiri Elías.” <sup>36</sup> Rishiyapainta

---

† **15:29** Iroowa rametaiyarini Judá-ite rotekayinata, arika rithainkashiryaante. Iro oshiyawori ametaiyarini aakapaini, arika ookoteri atziri athainkashireteri, ankante: “¡Piñaakero! ¡Pikemakero!” § **15:33** Iroowa ikantaitziri pairani: riweyaanaka ooryaa 6, ari omapokapaakari otsirenikitanake irojatzi ishaawiiteeni ooryaa 9.

apaani, romitsitsiyaatapaintzi manthakintsi kepishaariki, rankowitakeniri sawoopankeki, rowaankakotakeniri ratsimiyaatero, ikantzi: “Añaawakeriita ari ripokake Elías rowayiitairi.” <sup>37</sup> Rapiitanakero ikaimanake antawoite, te rañeenkatana. <sup>38</sup> Okanta tasorentsipankoki, sagaanake niyanki tontamawotatsiri ithatashiitzirori, etanakawo jenoki irojatzi isaawiki, apimawote okantanaka. <sup>39</sup> Ikanta reeware owayeripaini katziyawentakariri Jesús, iñaakeri ikaimanake antawoite ikamantanakari, ikantanake irirori: “Imaperowetatyama Itomintari Pawa jirika.”

<sup>40</sup> Eenitatsi eejatzi tsinane aminaintsiri jantyaatsikaini. Jiroka okaatzi: María Magdalasato, Salomé, María inaanate iyaapitsi Jacobo eejatzi José. <sup>41</sup> Jirokapaini tsinane iro tsipatakariri pairani Jesús Galilea-ki, osheki amitakoyetakeri. Otsipatakawo eejatzi otsipa tsinanepaini oyaatapaakeriri Jesús ripokake Jerusalén-ki.

### *Ikitaitakeri Jesús*

(Mt. 27.57-61; Lc. 23.50-56; Jn. 19.38-42)

<sup>42</sup> Tsireniityaanake. Iroowa kiteesheri riwetsikantapiintaitari rowaityaari oñaatamanai kiteesheriki rimakoryaantaitari. <sup>43</sup> Ikanta José poñaachari nampitsiki Arimatea, itsipatapiintari ipiyota Itzinkampaini, irijatzi oyaawentziriri Pawa impinkathariwentantai. Te ithaawi irirori riyaatashitanakeri Pilato, ikantapaakeri: “Pishinetagainari nonkitatairi Jesús.” <sup>44</sup> Tema romapokapaakeri Pilato, te Riyotzi kamake Jesús. Ikaimakaantakeri reeware owayeriite,

rosampitakeri imaperorika ikamake Jesús.  
<sup>45</sup> Ikamantaitakeri Pilato, rishinetainiri José raanairi. <sup>46</sup> Ramanantashitakeri kithaarentsi jentamankitatsiri. Ikentakoryaakotairi, iponatairi. Rowakotakeri imoontashiitzirira kaminkaripaini shirantaaki, roipinakaantake mapi, rashitakotantakari. <sup>47</sup> Okanta María Magdala-sato otsipatakawo María inaanate José, aminaiyakeni iroori tsika rowaitakeri.

## 16

*Rañaantaari Jesús*

(Mt. 28.1-10; Lc. 24.1-12; Jn. 20.1-10)

<sup>1</sup> Awisanake kiteesheri rimakoryaantaitari. María Magdala-sato, otsipatakawo otsipa María iriniro Jacobo, eejatzi Salomé, amanantake kasankari, iyaate itziritantaatyaari Jesús. <sup>2</sup> Okanta okiteeshetamanai tominko, ananinkanake iyaate omooki roowaitakerira Jesús. Shitowimatapaake ooryaatsiri iroowa areetzimatyajanta. <sup>3</sup> Okantawakagaiyani: “¿Litaka otatsinkerone mapi rashitakotantaitakariri?” <sup>4</sup> Iro aminawetapaaka, oñaatziro otatsinkaka mapi, tema antawo mapi inatzi. <sup>5</sup> Kyaapaake omooki rowaweeetakarira. Oñaashitapaakari mainari risaikake akoperoki, kitamaaniki okanta iithaare. Antawoite areetanakawo. <sup>6</sup> Ikantanakero irirori: “Eero pithaawashita. Iriima pipokashiwetari Jesús Nazaret-satzi, ikentakotaitakeri chapinki. Añagai, tekaatsi jaka. Paminero rowaweeetakarira. <sup>7</sup> Pipiyanake, pinkamantayetairi Riyotaanewo, pinkamantairi eejatzi Pedro ari riyaatai Jesús Galilea-ki,

arira piñaayetairi. Ikamantzitakemi ketziroini.”

<sup>8</sup> Ipiyapithatanakawo omoo, ompetawaitanaka. Tekaatsi itsipa atziri onkamantanake, tema antawo othaawanake.

*Roñaagaawo María Magdala-sato*

(Jn. 20.11-18)

<sup>9</sup> Ari rañagai Jesús owakera okiteeshetamanai tominko, iro retanaa roñaagaawo María Magdala-sato retsiyatatakagairi pairani raagawetawo peyari kaatatsiri 7. <sup>10</sup> Irojatzi iyaatashitantanakariri iroori tsipatakariri pairani Jesús, oñaapaatziiri riragaiyani, okamantapaakeri oñagairi iroori. <sup>11</sup> Ikanta ikemawetaiyawakawoni oñagairi Jesús rañagai, te ikemisantaiyironi.

*Roñaagaari Jesús apite Riyotaanewo*

(Lc. 24.13-35)

<sup>12</sup> Ikanta Jesús, roñaagaari apite Riyotaanewo ranashitaiyani awotsiki, pashiniwootapai eepi-chokiini. <sup>13</sup> Ari ripiyaiyanakani irirori, ikamantawetapaakari ikaataiynira. Eejatzi ikantzitaitakari irirori, te ikemisantaitziri.

*Rotyaantziri Jesús Riyotaanewo*

(Mt. 28.16-20; Lc. 24.36-49; Jn. 20.19-23)

<sup>14</sup> Rowawaiminthaita Riyotaanewo ikaatzi 11, ari roñaagaari Jesús, ikisathatapairi, iñaakeri kisoshire ikantaiyani, te ikemisantziri ikaatzi ñaayetairiri rañagaira. <sup>15</sup> Ikantapairi: “Piyaate pithotyeero maawoini kipatsi. Pinkenkithatakagairi atziripaini Kameethari Ñaantsi. <sup>16</sup> Inkaate kemisantanairone, omitsitsiyaataachane, iriira

awisakotaatsine. Iriima kaari kemisantanairone, rowasanketaiteri. <sup>17</sup> Jiroka inkantaiya inkaate kemisantanaatsine: retsiyatakotakaayetairi raagayetziri peyari raakotaina nowairo naaka. Riñaawaiyetairo inashiwaiyetachari ñaantsi. <sup>18</sup> Arika rotaiyawetyaari maanke, arika rirawetyaawo piyatatsiri, tekaatsi onkanteri, eero ikami. Ari onkantakya retsiyatakotakagairi mantsiyaripaini.”

*Owenonkaawo Jesús inkiteki  
(Lc. 24.50-53)*

<sup>19</sup> Ikaatakerero Awinkatharite ikamantayetakeri riyotaanewo, irojatzi rowenonkantaari inkiteki, itsipatapaari Pawa ipinkathariwentantapai. Risaikimotapairi rakoperoki. <sup>20</sup> Ryaataiyanaini riyotaanewo, ikamantantake maawoiniki nampitsi. Awinkatharite matakaayetakeriri, rantakaayetakeri kaari iñaapiintaitzi, iroowa riyotantaityaari imaperotaty okaatzi ikamantantayetziri. Ari onkantaitaatyeeyaani.

**Kameethari Ņaantsi: ikenkitha-takoitziri  
awinkatharite Jesucristo; Owakerari  
aapatziya-wakagaantsi**

**New Testament in Ashéninka, Ucayali-yurúa  
(PE:cpb:Ashéninka, Ucayali-yurúa)**

copyright © 2000 Wycliffe Bible Translators, Inc.

Language: Ashéninka, Ucayali-yurúa

Translation by: Wycliffe Bible Translators, Inc.

Ashéninka, Ucayali-yurúa [cpb], Peru

**Copyright Information**

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ashéninka, Ucayali-yurúa

**© 2000, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 11 Nov 2022 from source files  
dated 29 Jan 2022

03413587-4161-5845-9f63-68583816dfcd